



7 8 9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5

40-4514

丁翁一座請大藏及有
家書置於杭州華雲山
我微笑游院庭府中永
為學者不敢許出院內
當山二母鐵牛機譯註



B 64853

四經同卷

萍沙王五願經

瑠璃王經

佛說海八德經

佛說法海經

萍沙王五願經

吳月支優婆塞支謙譯

聞如是一時佛在王舍國鷄山中與五百比丘俱時
王舍國王號名萍比沙少小作太子意常求五願一
者願我年少爲王二者令我國中有佛三者使我出

7 8 9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5

入常往來佛所四者常聽佛說經五者聞經心疾開解得須陀洹道是五願萍比沙王皆得之時王舍國北方有異國國名德差伊羅其國王名弗迦沙甚高絕妙宿命時曾更見佛受佛經道學身中六分經何等六分一者身中有地二者身中有水三者身中有火四者身中有風五者身中有空六者身中有心身中凡有是六分萍比沙王與弗迦沙王生未曾相見遙相愛敬如兄弟常書記往來相問遺不絕萍比沙王意念令我得絕奇好物以遺弗迦沙弗迦沙王亦常意念令我得絕奇好物以遺萍比沙王弗迦沙王

國中奄生一蓮華一枚有千葉皆金色遣使者以遺萍比沙王萍沙王見華大歡喜言弗迦沙王遺我物甚奇有異萍比沙王作書與弗迦沙王言我國中有金銀珍寶甚多我不用爲寶今我國中生一人華人華字佛紫磨金色身有三十二相弗迦沙王讀書聞佛聲大歡喜踊躍毛衣皆堅宿命曾已見佛故毛爲堅弗迦沙作書與萍比沙王願具聞神佛所施行教戒當所奉行願具答意弗迦沙王却後數日自念言人命不可知在呼吸間我不能復待萍比沙報書不如便自行見佛弗迦沙王至九十九小國小國王曰

來朝弗迦沙勅諸小國王及群臣百官諸兵皆悉嚴
駕發行到王舍國佛所道逢萍比沙王書書上言佛
教人棄家捐妻子斷愛欲當除鬚髮著法衣作沙門
所以者何人愚癡故不當爲者而爲之便爲癡從癡
爲行從行爲識從識爲名色從名色爲六入何等爲
六入一者眼二者耳三者鼻四者口五者身六者心
是爲六此六事皆外向眼向色耳向聲鼻向香口向
味身向細軟心向欲是爲六向從六向爲合從合爲
痛樂從痛樂爲愛從愛爲受從受爲有從有爲生從
生爲老死憂悲苦不如意惱如是合大苦陰隨習凡

合此勤苦合名人智者自去愚癡愚癡盡衆惡消除
惡消除便行盡行盡識盡識盡名色盡名色盡六入
盡六入盡合盡合盡痛樂盡痛樂盡愛盡愛盡受盡
受盡有盡有盡生盡生盡老死盡老死盡已憂悲苦
不如意惱如是合大苦陰隨習爲盡便不復生不生
卽得泥洹道無爲弗迦沙王讀書竟自思念夜人定
後群臣百官士衆皆卧出寂然無聲竊起亡去入丘
墓間便自剃頭被法衣作沙門無飯食應器便取冢
間久死人髑髏淨刮洗以爲應器持是髑髏應器轉
行到王舍萍比沙王國止於城外舉頭視日念今日

至佛所晚明日乃行弗迦沙王前報窯家願寄一宿
窯家言大善我舍幸寬有宿止處弗迦沙王於外取
小草蓐入於一屏處布座坐其上自思惟五內佛以
天眼從鷄山中遙見弗迦沙王來到王舍國止於城
外窯家佛念弗迦沙王命盡明日恐不復生相見佛
卽飛行就到窯家門外佛報窯家願寄一宿窯家幸
大可得相容屬者有一沙門來寄宿自與相報相便
安者便可止宿佛卽前至弗迦沙王所言我從主人
寄一宿云當報卿卿寧肯令我一宿耶弗迦沙言我
適有小草蓐纔足坐耳此舍幸寬卿便自在所欲宿

耳佛便自左右取小草蓐於一處坐佛端坐過三夜
弗迦沙亦端坐佛自念是弗迦沙坐安諦寂寞不動
不搖佛意試欲前問用何等故沙門受何經戒喜何
等經佛起到弗迦沙前問言卿師受誰道用何等故
作沙門弗迦沙報言我聞有佛姓瞿曇父字悅頭檀
白淨王也其子髮頭鬚作沙門得佛道我師事之我
用佛故作沙門佛所說經入我心中我甚喜之佛問
寧曾見佛不弗迦沙言未曾見設使見者寧能識是
佛不弗迦沙言見之不能識佛念是賢者爲用我故
作沙門續當爲子說宿命時所知經爾乃解疾耳佛

789101234567892012345678930123456789

語弗迦沙言我爲卿說經上語亦善中語亦善下語亦善爲卿說身中六分事善聽之弗迦沙言大善佛言合此六事能成爲人身人身凡六事有所覺知人志用十八事轉動人意凡有四事道人所當奉行奉行已志不復轉志不復轉者便得道得道已不復生不復老不復病不復於今世死亦不復於後世死亦不復愁亦不復憂亦不復怒亦不復愛是爲度世之道請解六事合爲人熟聽之一者地二者水三者火四者風五者空六者心何等爲地地有二品身地外地何等爲身地者謂髮毛爪齒皮肉筋骨

脾腎肝肺腸胃身中諸堅者皆爲地身地外地同合爲地身地外地非我地適無所復貪愛知者當熟思惟是以自解何等爲水水有二品身水外水何等爲身水者謂淚淚唾膿血汗肪髓腦小便身中諸軟者皆爲水身水外水同合爲水身水外水非我水適無所復貪愛知者當熟思惟以自解何等爲火火有二品身火外火何等爲身火者謂身中溫熱腹中主消食身中諸熱者皆爲火身火外火同合爲火身火外火非我火適無所復貪愛知者當熟思惟以自解何等爲風風有二品身風外風何等爲身風者謂上氣

7 8 9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5

風下氣風骨間風腹中風四肢風喘息風身中諸起者皆爲風身風外風同合爲風身風外風非我風適無所復貪愛知者當熟思惟以自解何等爲空空有二品身空外空何等爲身空者謂眼空耳空鼻空口空喉空腹空膾空食所出入空是爲身空身空外空同合爲空身空外空非我空適無所復貪愛知者當熟思惟以自解智者學道能自別知身中五分餘一分者心清淨無欲自念我清潔如是若願欲上第二十五空慧天恐於二十五天上壽數千劫不得脫若復願上第二十六識慧天壽復倍於二十五天上

恐爲不得脫若復願欲上第二十七無所念慧天壽復倍二十六天上恐復不得脫若復願欲上第二十八無思想天壽八十四千萬劫恐復不得脫志便厭苦壽久不得脫便取泥洹道何等爲六事名合者謂目合於色耳合於聲鼻合於香舌合於味身合於細滑心合於知是爲六合何等爲志十八轉者謂目爲好色轉爲惡色轉爲中色轉耳爲好聲轉爲悲聲轉爲惡聲轉鼻爲好香轉爲惡香轉爲臭香轉舌爲美味轉爲惡味轉爲無味轉身爲細軟轉爲麤堅轉爲寒溫轉心爲善事轉爲惡事轉爲世事轉爲志十八

轉何等爲四事堅制人者一爲至誠二爲等愛三爲智慧四爲消滅諸惡是爲四堅志目所貪愛得之因快樂快樂離人自覺過去從苦致苦能知爲苦苦已去自知爲脫苦人行苦難得樂當思惟斷諸惡事因得不苦不樂自知遠離諸苦譬如兩木相揩生火因別兩木各著一面火亦滅木亦冷恩愛合便得苦棄捐恩愛自知爲脫譬如鋸金師得好金自在欲作何等奇物臂環耳璫步搖花光及百種皆能作之道人持心當如是鋸金師自在欲生不假令欲生二十五天二十六天二十七天二十八天然審皆有是雖久會當壞皆當過去無有常知當復過去意不復向不復念不復思不復愛是名爲無爲智者自思惟如是乃爲高耳人遠離諸惡乃爲智耳目所見萬物皆當過無有常無爲亦不復去亦不復來道人知是者便信於道無爲最爲至誠未得道時所喜愛樂身心所生得道已皆棄捐之人棄所在恩愛是名爲無爲志在姪決故不得脫志在瞋怒故不得脫志在愚癡故不得脫道人知是者因棄姪決之心棄瞋怒之心棄愚癡之心拔恩愛之本斷其枝條截其根莖不復生滋是名無爲自念有我志復動無我志復動我端正

7 8 9 10 11 2 3 4 5 6 7 8 9 20 1 2 3 4 5 6 7 8 9 30 1 2 3 4 5

志復動我不端正志復動人豫自念如是是爲病是爲劇是爲痛是爲不脫是故不欲多念是謂諸苦之要弗迦沙本不知是佛得第三阿那含道能知爲佛耳卽起以頭面著佛足言我實愚癡無狀失於禮敬佛便自現光景威神弗迦沙便自悔過言我愚癡人佛言若能自悔過爲善令若過除弗迦沙言願持我作沙門佛問若作沙門衣鉢具不弗迦沙言未具佛言沙門衣鉢不具不得作沙門弗迦沙言諾請行具之佛言大善弗迦沙起爲佛作禮遶佛三匝弗迦沙明日卽入城入城未達城中有少齒牛奔走已角

觸抵弗迦沙諸比丘展轉聞之白佛言佛昨日可於窯家爲說經沙門弊行具衣鉢爲犇牛所抵殺如是當趣何道佛言是大長者我爲說經皆悉心受奉行之卽得第三道須陀洹斯陀含阿那含便棄五蓋一者婬泆二者瞋怒三者睡眠四者戲樂五者悔疑不正之心今生十六天上阿那含中便自於天上得阿羅漢度世去令諸比丘共取弗迦沙身好收葬之於其上起塔諸比丘卽共承受佛教卽爲起塔佛說經已諸比丘皆叉手爲佛作禮

萍沙王五願經

終

6 7 8 9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5

璫璃王經

晉三藏竺法護譯

聞如是一時佛遊迦維羅衛釋氏精舍尼拘類樹下與五百比丘侍者阿難金剛力士樓由俱於城中有舍夷貴姓五百長者共爲世尊造立講堂自相興誓講堂成已當請正覺於上設供沙門梵志長者居士辟黎人民不得先佛妄昇此堂若違要者罪在不測舍衛國王時有太子名維樓黎產育之初與璫璃寶俱因以爲號領衛士定省外氏方來入城見視講堂高廣嚴淨都雅殊妙世所希有則於其上頓止息涼

監講堂者往白諸貴姓言舍衛太子來止講堂貴姓聞之興怒罵曰吾等家產有何異德敢登此堂本造斯殿乃爲佛舉當具上饌延屈世尊至真聖衆供養畢訖然後吾等乃宜自處而微者前尊置體于此尋遣使者而罵辱之催逐發遣令不久滯所踏之地剗去足跡所履寶階輒更貿易時璫璃太子聞其罵音姿色變動心懷毒恚勅太史曰深憶記之須吾爲王當誅此類太史阿薩陀此名無信能觀天文占究災怪令書此狀內于帶中挾惡識非嚴還還歸不復前至朝覲外家太子父王名波斯匿與后末利駕乘導從詣

7 8 9 10 11 12 13 14 15 16 17 18 19 20 1 2 3 4 5 6 7 8 9 30 1 2 3 4 5 6 7 8 9 30

祇樹園下車却蓋免冠解劍屏拂脫屣除四種兵步
涉小徑與末利俱五體投地稽首爲禮却坐一面琉璃
太子時歸還宮無所瞻覩問左右曰父王太后今
爲所在奏曰造佛太子聞問欣幸所領不復解嚴遂
至精舍曰宜知是時於是太子逼害翼從王之近臣
五百餘人一時夷滅却王冠幘蓋劍拂履服乘諸飾
外無白者於時世尊爲王及后說世無常愛欲合會
別離法句王立不遑轉后得覩道迹佛說經已王稽
首還不見侍輔而僵屍狼籍惟王衣冠二人得免逃
入樹間還與王遇王問之曰群僚所在一人答曰太

子率勒所統憎將還宮王謂末利子造不順謀逆如
斯素知此吾當避以國付之精舍左右族姓愍王及
后體柔狀樂不堪步涉濟以車乘弊陋難處遂昇進
邁至于城門先時太子列五百人置門鎮衛勅門監
曰若父王來勿聽使入王曰若不得入吾將焉如曰
詔大王當令出境時王波斯匿涕泣哽咽以偈歎曰
誠哉世尊教 所演審而諦 與衰與貴賤
一切無常住 寧守戒念道 不貪厚俸祿
僥聞講法會 不願億國土 王據國恣情
饗穢遑所欲 聞法蒙解脫 塵垢用銷除

爾時觀者無數千人聞王歎音八百人發大道意皆
立不退憂色不悅王后末利白王曰幸勿愁憤可共
俱逝還我父國卽便進發七日七夜到迦維羅衛兜
薩聚值冥門閉亦不得入各共饑渴無所向仰求乞
無地止於水傍人洗菜處得逆羅葡萄食之臚脹腹痛
而薨王后悲動舉聲大哭守聚者問曰何人乎曰吾
王后也又問王爲在何乎后曰痛哉王薨水側聚守
門者卽馳白舍夷諸貴姓貴姓聞凶奔波驚愕尋皆
來出賈贈殯棺闋維如法咸皆號悼莫不摧感爾時
貴族釋摩男者瞿夷之父也與諸豪右以偈歎曰

有子有財 思惟波波 我旣非我 何有子財
愚癡自怙 豪尊有終 太子用國 犆入地獄
釋氏貴姓二百五十深惟無常得不退轉五百女人
未出家者得不起法忍於是瑠璃太子聞父王薨卽
在殿稱制爲王異道太史出帶中書證案本狀記惡
之忘聞之大怒心意憤踊召四種兵伐迦維羅衛佛
知其意從精舍出止于路要坐於萎枯樹下斯須之
頃太子軍至時瑠璃王遙見世尊卽便下象車稽首
于地長跪問佛惟天中天有菩提附差尼拘類秘鉢
優蠱鉢薩羅怛羅捷尼放羅有此七樹其蔭高大有

目犍連前白世尊是何足言我之神力正覺所究能
以右掌舉舍夷國跳置空中上不至天下不至地瑠
璃王殺焉能得乎佛告目連知汝威德通足如斯宿
命之罪誰當代受又曰能以鐵文籠疏遮此國上又
以鉢覆使無形候擲置他方異土又以四坡須彌山
南內著于山然後合之各得所安又大海水深廣之
量三百三十六萬里我以此國浮置中央令諸人民
無往來想又以此國倚須彌山頂復能倒覆令無毀
害又下沒之金剛地際又打擲于琉璃王衆四種之
兵置大鐵圍山表使兩怨敵不相討伐佛言善哉世

德茂盛何因棄捨處枯槁多刺樹耶佛告琉璃王雖
有七樹樹蔭茂盛盛豈有常吾坐刺樹以爲安隱用
哀愍傷親屬故也王心念言先古所載藏室秘識用
兵征旅遇沙門者轉迴軍還況今值佛焉得進乎稽
首佛足即便返旅還于舍衛來日未久侍者阿難力
士樓由翼從世尊還尼拘類園令阿難敷座宣告四
輩皆令集會時佛尊顏姿容無耀項無光明衣服變
色阿難察坐以定則整衣法服右膝投地又手白言
侍尊積年未覩三變佛告阿難却後七日迦維羅衛
釋氏貴姓皆當傷斃現斯變者爲家中持服故也大

尊信汝此十威力能辦此舉舍夷貴戚宿世殃罪孰堪畢償而代受者阿難白佛寧有謗詭祐護此國令安隱乎佛言若舍夷人能同心不與外讎有往來緣國可全也太史三諫王宜用時進討舍夷王聞赫怒興軍勒衆世尊知之還坐枯樹如是至三王亦三還第四征時佛不遂屬精銳四品之兵到舍夷國界釋氏豪姓右亦多集衆出而禦之族黨驍勇強盛善射射四十里者射二十里者十里者七里者在其本德御飛破的箭不虛發能折一髮以爲七分去有里數射盡中之尋聲應弦曾無遺漏於是交戰射瑠璃王

軍穿旛折幢裂蓋摧杠截轔轔蹀決鎧帶鞘絕弓弩弦不害象馬牛畜之命射珥臂指環釧瓔珞而不中肌翦除鬚髮左右眉鬚髮毛睫亦不害體瑠璃怖駭問臣下曰敵去此幾何而箭所至傷毀若茲答曰或四十里二十里十里近者七里王聞加憚不能自寧將破敵軍卽憚還還太史諫曰大王莫懼慎無敗却舍夷人民皆奉佛戒爲清信士慈仁不殺以箭恐人無傷害意寧自喪身不天生命且更整陣并心撲討將牢持重剋捷不久諸臣啓曰察敵軍射陷遠無形非力所拒懼被摧折永令臣等爲糜戮之虜箭不可

7 8 9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5

當置時安據小史之謀不足專從各各心動志存逆
徂王大奮怒催勑進戰舍夷外衆奔走堡城閉門自
固列陣圍繞至于七日示悟去就招懷誘納唱令內
冠宜時歸命若不出降殄滅爾類釋氏共議當堅城
守禦當閉門稽穎當密潛奔竄躡狼狽則各賦籌
驗定衆心受籌者多不受者少以少從多開門助惡
成禍內與外應欲令敵勝勸善者少得開門入格殺
門衛五百人斬害不訾生縛貴姓三萬人埋著于地
但令頭現驅迫群象比足蹈殺然後駕犁而耕其首
值此酷者皆須陀洹釋摩男者波斯匿之舊好也自

謂國人諦觀無常苦毒之對宿罪當償勿懷怨恨生
現尋死存者忽終若干之痛斧解五枷喟然悲歎食
福同時而受禍一處豪族七萬餘生復見見生獲鐵
鎧其頸貴姓女千人以槊貫之羅堅道側貴姓年少
嬰兒置于格上而射殺之時瑠璃王見釋摩男與衆
辛苦顧謂臣曰是何人乎答曰釋摩男釋摩男來欲
有所乞王曰現之釋自陳曰王之大王存遇隆厚聽
納所啓當具以聞王識委曲恣其所說願節威怒惟
權止兵無令放逸多所殘害我入池中斯須當還與
王密議立見策也待我出水乃復曜旅王心與口言

78901234567892012345678930123456

人在水中勢不得久卽聽所白於是摩男爲國人民遭大厄故辭行入池解髮繫樹自沉于水良久不還王大怪焉遂遣左右往求撩索於樹根下得其屍喪出殯池側王甚憐之有悲哀心用門族故自沉而死其義若茲吾爲國王不忍小忿豈當急戰使所害彌熾乎前三億人畢對并命次三億人蒙自次之救得皆視息奔突走脫得全濟命又三億人修家供養歡蘸熙怡妓樂自娛不知外有并命之厄亦不聞有奔波之怖安雅如常一無所豫瑠璃王厚葬摩男存寵其後王平舍夷更立長安慰畢訖還舍衛國佛與弟

子至迦維羅衛見諸人民傷殘者多又察衆女人杌無手足耳鼻肢體身形裸露委存坑塹無用自敝世間苦痛如是不仁之人相害甚酷佛言諸比丘彼瑠璃王肆意惡逆罪盛乃爾却後七日有地獄火當燒殺之現世作罪便現世受太史奏識怪與佛同王大恐怖乘船入海冀得自免停住海中至于七日期盡水中則有自然火出燒船及王一時灰滅世尊哀愍諸裸露者卽以威神動忉利天紫紺之殿帝釋及后首耶之等無數天子各齋天衣俱共來下以服覆偏裸露厄者佛爲衆女而說偈曰

諸仁目所見 現在變如是 異故莫造新

後可長度脫

佛歎偈已復爲說法諸來觀者天龍鬼神阿須倫迦
留羅真陀羅摩休勒梵志居士長者人民無央數千
聞佛所說五百比丘漏盡意解五百梵志其餘現人
見國荒毀傷殘之痛出家遵道皆爲沙門五百天子
立不起法忍二百阿須倫千龍王皆發無上正真道
意溝坑五杌裸形男女命盡得上生忉利天千五百
人得見道迹千人得不還證佛說此已一切偏聞稽
首而還

瑠璃王經

終

佛說海八德經

姚秦三藏法師鳩摩羅什譯

聞如是一時佛遊無勝國時在河邊常以十五日爲
諸沙門說戒經佛坐靜默久而無言阿難整服長跪
白曰沙門坐定樂聞清法世尊默然阿難三起白夜
已半可說戒經世尊乃曰諸沙門中有穢濁者心邪
行違言與法乖沙門之戒威神致重非彼下賤所能
執行清濁相違故吾不說尊德目連一心入定道眼
淨觀具見彼心有可棄之行矣目連卽謂之曰起

6 7 8 9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5

非爾俗人所應坐處也彼不肯起牽臂使出曰爾無至德心懷六邪何敢以臭溷之體坐天香之座爾是棄人非沙門矣目連卽還就清淨座佛告目連子何一愚好喻不出牽臂乃去佛告沙門靜聽吾言諸沙門曰唯然受教觀彼巨海有八美德其廣卽汪洋無涯其深則有不測之底稍入稍深無前所礙斯一德也海潮不過期先際斯二德也海含衆寶靡所不死屍臭朽海不容焉神風吹漂上岸之邊斯三德也海懷衆珍黃金白銀瑠璃水精珊瑚龍珮明月神珠千奇萬異無求不得斯四德也普天之下有五大河

流行注海西流者名恒南流者名邪云東流者兩河一名沙陸一名阿夷越北流名墨五河流邁俱入于海皆去舊名合爲海斯五德也五河萬流霖雨終時立天地來雨落河注海水如故益無增減斯六德也海有衆魚巨軀巍巍第一魚身長四千里第二魚身長八千里第三魚身長萬二千里第四魚身長萬六千里第五魚身長二萬里第六魚身長二萬四千里第七魚身長二萬八千里斯七德也海水通鹹邊中如一斯八德也以斯之故質亮神龍欣心樂之吾經妙典亦有景德讀之無盡其義日深梵魔帝釋無能

6 7 8 9 10 11 12 13 14 15 16 17 18 19 20 1 2 3 4 5 6 7 8 9 30 1 2 3 4 5

測度猶海廣遠甚深難測以斯之故諸沙門樂之斯一德矣吾諸弟子更相檢率誦經坐禪禮儀景式不失其時也猶海之潮不過期先際斯二德也吾法清潔志在澹泊衣食供已不畜微餘若有沙門志趣穢濁以法彈遣不得處廟猶海弘裕不容臭屁斯三德也吾道衆經其義備悉沙門潛思練去心垢貪姪恚嫉愚癡衆穢猶如磨鏡瑩垢盡之又蕩微翳照無不覩一坐自思存惟徃古生死之源得無不知一惟天地萬物若幻夫有合會必當別離二常慈心愍世愚惑作行顛倒不自知誤四自精思既知徃古又照未

然衆生冤神所當趣向吾向道以心淨爲珍寶沙門去穢得淨行者其心喜之猶彼質亮樂海衆寶斯四德矣吾道弘大合衆爲一帝王種梵志種君子種下賤種來作沙門者皆棄本姓以道相親明愚相進意如兄弟猶彼衆流合名曰海以斯之故沙門樂之斯五德矣吾道微妙經典淵奧上士得之一號溝港二號頻來三號不還四號應真應真之道其心清淨猶夫明珠垢藏之德分身散體存亡自由住壽無極亦不老病猶彼巨海有神龍魚以斯之故沙門樂之吾之經籍義美甘露仙聖所不聞梵釋所希覩徃古來

7 8 9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5

今無物不記邊中皆正猶海通鹹亦以斯故沙門樂之天見吾經者意皆趣無爲矣海有八德吾經亦然阿難又起稽首白曰東旦欲明願說重戒世尊曰自今之後吾不復說重戒之經戒之不從恐彼雷神威怒加之也吾以斯故不說戒經自今以往更相檢率以十五日會說戒經諸比丘起爲佛作禮

佛說海八德經

終

佛說法海經

西 晉 沙 門 譯 法 灶 譯

聞如是一時佛遊瞻波國漢咗利池上與大比丘衆

俱月十五日時應說戒佛坐集已久而如來默然不說戒侍者阿難更整衣服跪而白佛初夜向竟中夜將至大衆集久世尊將無疲倦願以時說戒佛猶默然衆坐旣久時有比丘名曰阿若都盧更整衣服長跪白佛初夜中夜已過雞將向鳴世尊得無疲倦衆僧集久願佛說戒世尊復默然又復白言明星已出時將過矣佛言比丘且聽衆僧之中有不淨者故吾不得說戒耳賢者大目犍連心念吾當定意觀之誰不淨者目連白佛我欲定意觀誰不淨者不淨者命令出衆世尊告曰卿欲定意觀不淨者令其出衆此

言大善便可觀之目連卽定意觀之見其弟子犯于
重戒目連從定意起至犯戒比丘前而數之曰汝爲
沙門奉戒爲本戒猶人之頭首沙門戒行宜令清白
如冰如玉此如來之座賢聖之會度世者之聚清淨
道德者之所集處此座猶如旃檀之林卿以伊蘭臭
穢亂于真正目連手自引其弟子出卿是棄捐之人
不得豫如來大衆之清淨集也無以穢濁廁豫大僧
大集大海不受穢屍卿自思之無穢賢衆穢人旣出
目連白曰穢濁之人卽以棄遠衆已清淨惟願世尊
以時說戒世尊猶復默然目連怪之四向觀察見座
上向比丘已復在座目連重勅之曰卿爲棄人何爲
不自引罪穢重坐此座爲目連重遣之乃出座去目
連復白世尊穢人已出大衆已淨無復穢惡惟願世
尊以時說戒令衆僧得修淨業佛告目連吾自今後
不復說戒汝等可自共說戒若我說戒人於衆中犯
戒默然不自引罪而豫如來座者此爲默然妄語默
然妄語頭破七分如來於大衆說戒甚爲不易自今
以後汝自說戒目連白佛弟子聞道如來先化之爲
非弟子自悟而成道也如來聖德厚重天地言真而
要弟子誦習得成道果如來猶天雨百穀草木無不

仰榮弟子德淺道小人不服信世尊哀愍聾俗使一切獲安得信得正以濟其志日連殷懃苦請至三四五世尊告目連曰汝爲一切請求如來懸慇乃至四五吾今當爲汝等說之吾僧法猶如大海有八德汝等聽之大海之水無滿不滿吾法如之無滿不滿此第一之德大海潮水尋以時而來不失常處吾四部衆受吾戒者不犯禁戒違失常法此第二之德大海之水惟有一味無若干味無不以鹹爲味吾法如是禪定之味志求寂定致神通故四諦之味志求四道解結縛故大乘之味志求大願度人民故此第三之

德大海旣深而廣無能限者僧法如是無不深妙八方之大莫大於僧法僧法最爲弘大此第四之德大海之中金銀瑠璃水精珊瑚碑碣碼碯摩尼之妙無不備有吾僧法之中三十七品道寶之妙神足住壽飛騰十方靡所不適瞬息之間周旋無量佛界到殊勝之刹能以其道化導群生淨已佛土此第五之德大海之中神龍所居娑竭龍王阿耨達難頭和羅摩那私伊羅末如此諸龍妙德難量能造天官品物之類無不仰之吾僧法亦復如是四雙八輩之士十二賢者菩薩大士教化之功彌茂彌美此第六之德大

經四
四經同卷

怕 惕徒覽切 怕自各切

愒

靜

爲貌

湖江嘉興府楞嚴寺般若堂庚子年餘賛刻此
四經同卷計八千五百八十八字
該銀五兩一从

順治十八年五月 日徑山比丘釋迦耶闍識

上說法海經

佛說義足經卷上

吳優婆塞支謙譯

禁貪第一

聞如是佛在舍衛國祇樹給孤獨園時有一梵志祇
樹間有大稻田已熟在朝暮當收穫梵志晨起往到
田上遙見禾穟心內歡喜自謂得願視禾不能捨去
佛是時從諸比丘入城求食遙見梵志喜樂如是便
謂諸比丘汝曹見是梵志不皆對言見佛默然入城
食後各還精舍卽日夜天雨大雹皆殺田中禾梵志
有一女亦以夜死梵志以是故愁憤憂惱啼哭無能

止者明日衆比丘持應器入城求食便聞梵志有是
災害啼哭甚悲非沙門梵志及國人所能解其憂者
比丘食竟還到佛所作禮白梵志意狀如是言適竟
梵志啼哭來到佛所勞佛竟便坐佛邊佛知其本憂
所念卽謂梵志言世有五事不可得避亦無脫者何
等爲五當耗減法欲使不耗減是不可得當亡棄法
欲使不亡棄是不可得當病瘦法欲使不病瘦是不
可得當老朽法欲使不老朽是不可得當死去法欲
使不死去是不可得凡人無道無慧計見耗減亡棄
老病死法來卽生憂憒悲哀拍髀熟息耗身無益何
以故坐不聞知諦當如是梵志我聞有抱諦者見耗
減法亡棄老病死法來不以爲憂何以故已聞知諦
當如是是不獨我家耗世悉亦爾世與耗俱生我何
從獨得離慧意諦計我今已耗至使憂之坐羸不食
面目瘦色與我怨者快喜與我厚者代憂慘感家事
不修計耗不可復得已諦如是見耗減亡棄老病死
法來終不復憂也佛以是因緣爲梵志說偈

不以憂愁悲聲
多少得前所亡
痛憂亦無所益
至誠有慧諦者

怨家意快生喜
不憂老病死亡

欲快者反生惱
見其華色悅好
飛響不及無常
珍寶求解不死
知去不復憂退
念行致勝世寶
諦知是不可追
世人我卿亦然
遠憂愁念正行
是世憂當何益
佛復爲梵志極說經法次說布施持戒現天徑欲善
其惡無堅固佛知梵志意輒向正使見四諦梵志意
解使得第一溝港道如染淨繒受色卽好便起頭面
著佛足又手言我今見諦如引鏡自照從今已後身
歸佛歸法歸比丘僧受我爲清信士奉行五戒盡形
壽淨潔不犯戒便起繞佛三匝而去衆比丘便白佛
言快哉解洗梵志意乃如是至使喜笑而去佛語諸
比丘不但是返解是梵志憂過去久遠是闍浮利地
有五王其一王名曰桀貪治國不正大臣人民悉患
王所爲便共集議言我曹家家出兵皆拔自到王前
共謂王寧自知所爲不正施行貪害萬姓不急出國
去不者必相害傷王聞大恐怖戰慄衣毛悉豎以車
騎而出國去窮厄織草蓀賣以自給大臣人民取王
弟拜作王便正治不枉萬姓故王桀貪聞弟與將爲
王卽內歡喜計言我可從弟有所乞可以自活便上

7 8 9 10 11 12 13 14 15 16 17 18 19 20 1 2 3 4 5 6 7 8 9 30 1 2 3 4 5 6 7 8 9 30

書具自陳說便從王乞一隙可以自給王卽與之愍傷其厄得一隙便正治復乞兩隙四五至十隙三十四五十至百隙二百至五百隙便復乞半國王卽與之便正治如是久遠桀貪生念便興半國兵攻弟國卽勝便自得故國復生念我今何不悉興一國兵攻二國三國四國便往攻悉得勝復正治四國復生念今我何不興四國兵攻第五國便往攻卽復得勝是時陸地盡四海內皆屬王便改號自立爲大勝王天帝釋便試之寧知猷足不便化作小童梵志姓駒夷欲得見王被髮柱金杖持金瓶住宮門守門

者白王言外有梵志姓駒夷欲見王王言大善便請前坐相勞問畢却謂王言我屬從海邊來見一大國豐樂人民熾盛多有珍寶可往攻之王審足復欲得是國王言我大欲得天王謂言可益裝船興兵相待却後七日當將王往適言天王便化去到其日便大興兵益裝船不見梵志來是時王愁憂不樂拍髀如言怨哉我今以亡是大國如得駒夷不堅獲如期反不見是時一國人民迴坐向王王啼亦啼王憂亦憂王處憂未嘗止聞識經偈便生意而說言

增念隨欲 已有復願 日盛爲喜

從得自在

王便爲衆人說欲偈意有能解是偈義者上金錢一千時坐中有少年名曰鬱多鬱多卽白王言我今欲到王所解王憂母謂子子且勿行帝王難事如然火其教如利刀難可親近子言母勿愁憂我力自能證王偈義當復得重謝可以極自娛樂便到王所言我今來對其義卽說偈言

增念隨欲

已有復願

已放不制

如渴飲湯

悉以世地

滿馬金銀

悉得不厭

有點正行

如角距生

日長取增

人生亦爾

不覺欲增

飢渴無盡

日日復有

金山柱天

狀若須彌

悉得無厭

有點正行

欲致痛冥

未嘗聞之

願聞遠欲

歎者以黠

欲欲爲尊

欲漏難離

黠人覺苦

不隨愛欲

如作車輪

能使致堅

稍稍去欲

意稍得安

欲得道定

悉捨所欲

王言知意悉治世地盡四海內無不至屬是亦可爲

耽乃復遠欲貪海外國大勝王卽謂鬱多言

童子若善

以尊依世

說欲甚痛

慧計乃爾

汝說八偈

偈上千錢

願上大德

說義甚哀

鬱多以偈報言

不用是寶

取可自給

最後說偈

意遠欲樂

家母大王

身羸老年

念欲報母

與金錢千

令得自供

大勝王便上金錢一千使得供養老母佛語諸比丘
是時大勝者卽種稻梵志是也時童子鬱多者則我

久住義足經
身是也我是時亦解釋是梵志痛憂我今亦一切斷
是梵志痛憂已終不復著苦佛以是本因演是卷義
令我後學聞是說欲作偈句爲後世作明令我經法
增念隨欲 已有復願 日增爲喜
從得自在 有貪世欲 坐貪癡人
旣亡欲願 毒箭著身 是欲當遠
如附蛇頭 違世所樂 當定行禪
田種珍寶 牛馬養者 坐女繫欲
癡行犯身 倒羸爲強 坐服甚怨

次冥受病

船破海中

故說攝意遠欲勿犯精進求度載船至岸佛說義足
經竟比丘歡喜

優填王第二

聞如是佛在舍衛國祇樹給孤獨園時有一比丘在
拘叅國石澗土室中長鬚髮爪被壞衣時優填王欲
出遊觀到我迹山侍者卽勑治道橋還白王已治道
王可出王但從美人妓女乘騎到我迹山下車步上
有一美人經行山中從崎至崎顧見石澗土室中有
一比丘長髮鬚爪衣服裂敗狀類如鬼便大聲呼天
子是中有鬼是中有鬼王便遙問何所在美人言近
在石澗土室中王卽拔劍從之見比丘如是卽問汝
何等人對言我是沙門王問汝何等沙門曰我是釋
家沙門王言是應真耶曰非也寧有四禪耶復言無
有也寧三禪二禪耶復言無有寧至一禪耶對曰言
實一禪行王便恚內不解顧謂侍者黃門以姪意念
是沙門凡俗人無真行奈何見我美人便勑侍者急
取斷絃蠶來齧是人侍者便去山神念是比丘無過
今當恐死我可擁護令脫是厄便化作大猪身徐走
王邊侍者卽白王大猪近在王邊王便捨比丘拔劍

逐猪比丘見王去速便走出到舍衛祇樹給孤獨園中爲諸比丘說本末比丘卽白佛佛是時因是本變有義生命我比丘悉知經卷出語爲後世學作明令我經道久住是時佛說義足經

繫舍多所願 住其邪所遮 以遮遠正道
欲念難可惠 坐可繫胞胎 繫色堅難解
不觀去來法 惠是亦斷本 貪欲以癡盲
不知邪利增 坐欲被痛悲 從是當何依
人生當覺是 世邪難可依 捨正不著念
命短死甚近 展轉是世苦 生死欲溪流

死時乃怨惱 從欲詆胎極 自可受痛身
流斷少水魚 以見斷身可 三世復何增
力欲於兩面 彼可覺莫著 莫行所自怨
見聞莫自滯 覺想觀度海 有我尊不計
力行拔未出 致使乃無疑

佛說是義足經比丘皆歡喜

須陀利第三

聞如是佛在舍衛國祇樹給孤獨園爲國王大臣及理家所侍敬事遇不懈飯食衣被卧具牀疾藥供所當得是時梵志自坐其講堂共議言我曹本爲國王

大臣人民理家所待遇今棄不復用悉反事沙門瞿
曇及諸弟子今我曹當共作方便敗之耳便共議今
但當求我曹部伍中最端正好女共殺之以其死屍
埋於祇樹間爾乃毀傷沙門瞿曇及諸弟子令惡名
遠聞待遇者遠離不復敬之學者悉不復得衣食皆
當來事我曹我曹便當爲世尊壞瞿曇世無能勝我
曹者卽共行謂好首言汝寧知我曹今棄不復見用
反以沙門瞿曇爲師汝寧能忿爲衆作利不好首言
作利云何曰惟捨壽命死耳答言我不能也曰汝不
能爾者從今以後終不復內汝著數中也女聞大不
樂卽言諾是我職當也衆學言善哉便共教女言從
今以後朝暮到佛所數往祇樹間悉令萬姓見知汝
如是我曹共殺汝埋著祇樹間令瞿曇得毀辱不小
女卽承敎數數往來沙門所令衆人知女如是便取
女殺埋著祇樹間衆梵志便相聚會到王宮門稱怨
言我曹學中有一女獨端正華色無雙今生亡不知
處王謂言女行來常在何所共對言常往來沙門瞿
曇所王言爾者當於彼求便從王乞吏兵王卽與之
尋求行轉到祇樹間便掘出死尸著牀上共持於舍
衛四道悉遍里巷稱怨言衆人觀沙門瞿曇釋家子

7 8 9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5

常稱言德戒弘普無上如何私與女人通殺埋藏之
如是當有何法何德何戒行乎食時衆比丘悉持應
器入城乞食衆理家人民遙見便罵言是曹沙門自
稱言有法德戒子曹所犯若此當有何善奈何復得
衣食衆比丘聞如是持空應器出城洗手足盛藏應
器到佛所作禮悉住不坐如事具說是時佛說偈言

無想放意妄語

衆鬪被箭忍痛

聞凡放善惡言

比丘忍無亂意

佛告比丘我被是妄謗不過七日耳是時有清淨女
字惟闍於城中聞比丘求食悉空還甚卽念佛及比
丘僧便疾行到祇樹至佛所頭面作禮達佛坐一邊
佛爲廣說經法惟闍聞竟起叉手白佛言願尊及
比丘僧從我家飯七日佛默然受之惟闍便達佛三
市而去至七日佛告阿難汝與衆比丘入城悉於里
巷四徼街道說偈言

常欺到邪冥

說作身不犯

重冥行欺具

自怨到彼苦

修地利分具

不守怨自賊

惡言截頭本

常關守其門

常尊及與毀

尊空無戒人

從口內衆憂

嫉心衆不安

博掩利人財

力欺亦可致

是悉皆可忍

是最以亡寶 有怨於正人 世六餘有五
惡有道致彼 坐意行不正 欺咤有十萬

阿難卽受教俱入城於里巷四街道說如佛所言卽時舍衛人民及諸理家皆生意言釋家子實無惡學在釋家終不有邪行是時衆與梵志自於講堂有所訟中有一人言露子曹事於外出聲言汝曹自共殺好首而怨佛及弟子乎大臣聞是聲便入啓王王卽召衆梵志問汝曹自共殺好首不便言實爾王怒曰當重罰子曹奈何於我國界自稱爲道而有殺害之心卽勅傍臣悉收子曹遍徇舍衛城里巷遞逐出國

界去佛以食時從諸比丘皆持應器入城時有清信士名阿須利遙見佛便往作禮揚聲白佛言聞者不識四方名心甚悲所聞經法不能復誦聞佛及比丘僧怨被惡名佛謂阿須利言不適有是宿命因緣佛便說偈言

亦毀於少言 多言亦得毀 亦毀於惡言

世惡無不毀 過去亦當來 現在亦無有

誰盡壽見毀 盡形尚敬難

佛廣爲阿須利說經便到須達家直坐正座須達便爲佛作禮又手言我屬者悲身不識方面所聞經法

不能復誦聞佛及比丘僧怨被惡名佛是時說偈言
我如象行鬪 被瘡不著想 念我忍意爾
世人無善念 我手無瘡痒 以手把毒行
無瘡毒從生 善行惡不成

佛廣爲須達說經便到惟闍家直坐正座惟闍作禮
竟又手言屬者我悲身不識方面所聞經法不能復
誦聞佛及比丘僧怨被惡名佛因爲惟闍說偈言
無曉欲使惱 內淨外何汙 愚人怨自誤

向風揚細塵

惟闍是時快飯食佛比丘僧竟澡水與下座聽佛說

經佛爲說守戒淨行悉見諸道便而去時國王波斯
匿具從車騎以王威法出城到祇樹欲前見佛故乘
騎未到下車步入遙見佛便却蓋解冠却諸侍從脫
足金屣便前爲佛作禮就坐又手白佛言屬者甚悲
身不識方面所聞經法不復誦聞佛及比丘僧怨被
惡名佛卽爲王說偈言

邪念說彼短 解意諦說善 口直次及尊
善惡捨不憂 以行當那捨 奉世欲自在
抱至德不亂 制欲人所詰

舍衛一國人民悉生念疑佛及比丘僧從何因緣致

是惡名聲厄共視佛威神甚大巍巍如星中月適無
敢難佛悉知其所念便說是義足經言

如有守戒行人 問不及先具演

有疑正非法道 欲來學且自淨

以止不拘是世 常自說著戒堅

是道法黠所信 不著綺行敎世

法不匿不朽言 毀尊我不喜恐

自見行無邪漏 不著想何瞋喜

所以我有以轉捨 鮮明法止著持

求正利得必空 以相空法本空

不著餘無所有 行不願三界生

可瞋冥悉已斷 云何行有處所

所當有悉裂去 所道說無愛著

已不著亦可離 從行拔悉捨去

佛說是義足經竟比丘歡喜

摩竭梵第四

聞如是佛在舍衛國祇樹給孤獨園時有一梵志字
摩竭卒死講堂同學便著牀上共以出於舍衛里巷
四街道舉聲言見摩竭者悉得解脫今見死屍亦解
脫後聞名者亦解脫諸比丘食時悉持應器入城求

食時見梵志說摩竭功德如是食竟悉潔應器還到
佛所作禮竟皆就坐卽爲佛本末說如是佛因是本
演是卷令我弟子悉聞解廣爲後世作明令我經道
久住說是義足經

我見淨無有病

信見諦及自淨

有知是悉可度

苦斷習證前形

見好人以爲淨

有慧行及離苦

黠除凶見淨徑

斷所見證如前

從異道無得脫

見聞持戒行度

身不汙罪亦福

悉已斷不自譽

悉棄上莫念後 有是行度四海
直行去莫念苦 有所念意便縛
常覺意守戒行 在上行想彼苦
捨本念稍入行 不矯言審有黠
一切法無有疑 至見聞亦所念
諦見聞行力根 誰作世是六衰
不念身不念尊 亦不願行至淨
恩怨斷無所著 斷世願無所著
無所有爲梵志 聞見法便直取
淫不淫著汗淫 已無是當著淨

佛說是義足經竟比丘悉歡喜

鏡面王第五

聞如是佛在舍衛國祇樹給孤獨園衆比丘以食時持應器入城欲求食自念言今入城甚早我曹寧可到異梵志講堂與相勞休便就坐是時諸梵志自共爭生結不解轉相謗怨我知是法汝知何法我所知合於道汝所知合何道我道法可倚行汝道法難可親當前說著後說當後說反前說多說法非與重擔不能舉爲汝說義不能解汝定知汝極無所有汝復何對以舌戟轉相中害被一毒報以三諸比丘聞

子曹惡言如是亦不善子言亦不證子曹正各起坐到舍衛求食竟舉藏應器還到祇樹入園爲佛作禮悉坐一面便如是事具說念是曹梵志學自苦何時當得解佛言是曹梵志非一世癡冥過去久遠是殿下以白王王勅大臣悉將是人去示其象臣卽將到象底一一示之令持象有持足者尾者尾本者腹者脅者背者耳者頭者牙鼻者悉示已便將詣王所王悉問汝曹審見象不對言我悉見王言何類中有

得足者言明王象如柱得尾者曰如掃箒得尾本者言如枝得腹者言如垂得脅者言如壁得背者言如高岸得耳者言如大箕得頭者言如臼得牙者言如角得鼻者言如索便復於持前共諍訟象諦如我言王是時說偈言

今爲無眼會 空諦自謂諦 見一言餘非

坐一象相怨

佛告諸比丘是時鏡面王者卽我身是時無眼人者卽講堂梵志是是時子曹無智坐空諦今子曹亦冥空諦無所益佛是時生是義具檢此卷令弟子悉解

爲後世作明令我經道久住說是義足經

自冥言是彼不及

著癡日漏何時明

自無道謂學悉爾

但亂無行何時解

常自覺得尊行

自聞見行無比

已墮繫世五宅

自可奇行勝彼

抱癡住望致善

已邪學蒙得度

所見聞諦受思

雖持戒莫謂可

見世行莫悉修

雖黠念亦彼行

興行等亦敬待

莫生想不及過

是已斷後亦盡

亦棄想獨行得

7 8 9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5

莫自知以致黠

雖見聞但行觀

悉無願於兩面

胎亦胎捨遠離

亦兩處無所住

悉觀法得正止

意受行所見聞

所邪念小不想

慧觀法竟見意

從是得捨世空

自無有何法待

本行法求義議

但守戒未爲諦

度無極衆不還

佛說是義足經竟比丘悉歡喜

老少俱死第六

聞如是佛在婆掃國城外安延樹下時有一行車人

出城未到安延樹車轂道敗便下道一面抱愁而坐
佛是時持應器從阿難入城求食道見車轂敗壞其
主下道坐抱愁不樂即說是優檀經

如行車於道 捨平就邪道 至邪致憂患

如是壞轂輪

遠法正亦爾

意著邪行痛

愚服生死苦

亦有壞轂憂

佛便入城城中時有一梵志壽年百二十死復有一
長者子年七歲亦死兩家俱送喪皆持五綵旛諸女
弱皆被髮親屬啼哭悲淚佛見因問阿難是何等人
聚會悲哀聲甚痛阿難即如事對佛因是本有生是

義令我弟子悉解檢是卷爲後世作明令我經法久
住時佛說是義足經

是身命甚短減百年亦死雖有過百年

老從何離死

坐可意生憂

有愛從得常

愛憎悉當別

見是莫樂家

死海無所不漂

宿所貪愛有我

慧願觀諦計是

是無我我無是

是世樂如見夢

有識寤亦何見

有貪世悉亦爾

識轉滅亦何見

聞是彼悉已去

善亦惡今不見

悉捨世剉何所

識神去但名在

既悲憂轉相嫉

復不捨貪著愛

尊故斷愛棄可

遠恐怖見安處

比丘諦莫忘念

欲可遠身且壞

欲行止意觀意

已垂諦無止處

無止者亦尊行

愛不愛亦嫉行

在悲憂亦嫉行

無輒沾如蓮華

已不著亦可望

見聞邪吾不愛

亦不從求解脫

不汙淫亦何貪

不相貪如蓮華

生在水水不干

尊及世亦爾行

所聞見如未生

佛說是義足經竟比丘悉歡喜

彌勒難第七

聞如是佛在王舍國多鳥竹園中時衆老年比丘在講堂坐行內事轉相問法采象子字舍利弗亦在坐中聞說內事律法難問問不隨律言亦無禮敬是時賢者大句私亦在坐中便謂舍利弗言無弟勿於老年比丘有所疑隨所言恭敬先學廣爲舍利弗說定意經如有賢者子發道久在家至意復念淨法便除鬚髮已信捨世事被法衣作沙門精進行附正離邪

已證爲行自知已度時賢者彌勒到舍利弗家舍利弗便爲彌勒作禮便就坐彌勒卽如法律難問舍利弗宜於是事不能對彌勒便起去入城求食竟已澡藏應器還到佛作禮畢就坐以偈問佛言

姪欲著女形 大道解癡根

願受尊所戒

得教行遠惡 意著姪女形

亾尊所教令

亾正致睡卧 是行失次第

本獨行求諦

後反著色亂 奔車亾正道

不存捨正邪

坐值見尊敬 失行亾善名

見是諦計學

所姪遠捨離 且思色善惡

已犯當何致

7 8 9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5

聞慧所自戒 痛慙却自思 常行與慧合
 寧獨莫亂俱 著色生邪亂 無勢亾勇猛
 漏戒懷恐怖 受短爲彼負 已著入羅網
 便欺出奸聲 見犯因緣惡 莫取身自負
 堅行獨來去 取明莫習癡 遠可獨自處
 諦見爲上行 有行莫自惰 無倚泥洹次
 遠計念長行 不欲色不色 善說得度痛
 悉世姪自食

佛說義足經竟比丘悉歡喜

戒辭梵志第八

佛在舍衛國當畱三月竟一時於祇樹給孤獨園中是時墮沙國諸長者子共賃一梵志名戒辭使之難佛取勝謝金錢五百梵志亦一時三月諷五百餘難中有變自謂無勝已者佛三月竟從衆比丘欲到墮沙國轉行郡縣說經次到墮沙候緩溪邊高觀殿中諸長者子卽聞佛衆比丘到國卽相聚會合五百餘人梵志言佛已到吾國宜早窮難梵志卽悉從長者子往到佛所相勞問便坐一面長者子中有爲佛作禮者向佛又手者默然者悉就坐梵志熟視佛威神甚大巍巍不可與言便內恐怖憚不能復語佛悉

7 8 9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5

知梵志及長者子共議作便說是義足經

自說淨法無上 餘無法明及我

著所知在極快 因緣諦住邪學

常在衆欲願勝 愚放言轉相達

意念義忘本語 轉說難慧所言

於衆中難合義 欲難義當竟句

在衆窮便瞋恚 所難解衆悉善

自所行便生疑 自計非後意悔

語稍疑妄思想 欲邪難正不助

悲憂痛所言短 坐不樂卧喧咋

本邪學致辭意 語不勝轉下意

已見是向守口 急開開難從生

意在難見對生 出善聲爲衆光

辭悅好生意喜 著歡喜彼自彼

自大可憐漏行 彼不學從何增

已學是莫空諍 不從是善解脫

多倚生痛行同 行求輩欲與難

或從來去莫慚 今當誰與汝議

抱冥柱欲難日 汝邪諦自守癡

汝行華不見果 所出語當求義

越邪度轉求明

法義同從相傷

於善法戒何言

彼善惡受莫憂

行意到來到聞

意所想去諦思

舉大將俱義軍

螢火上遍明照

佛說是義足經竟比丘悉歡喜

摩因提女第九

佛在旬畱國縣名悉作法時有一梵志字摩因提生女端正光世少雙前後國王亦太子及大臣長者來求之父皆不應得人類我女者乃與爲婦佛時持應器於縣求食竟鹽潔藏應器出城到樹間閑靜處

坐摩因提食後出行園田道經樹間便見佛金色身
有三十二相如日月王自念言持女比是大尊如此
人比我女便還家謂婦言兒母寧知得所願不今得
婿踰於女母聞亦喜卽莊飾女衆寶瓔珞父母俱將
女出城母見佛行跡文現分明謂父言寧知空出終
不得婿何故婦說偈言

姪人曳踵行 患者斂指步 癡人足踢地
是跡天人尊

父言癡人莫還爲女作患女必得婿卽將女到佛所
左手持臂右手持瓶因白佛今以女相惠可爲妻女

見佛形狀端正無比以三十二相瓔珞其身如明月
珠便姪意繫著佛佛知其意如火然佛卽時說是義
足經言

我本見邪三女 尚不欲著邪姪

今奈何抱屎尿 以足觸尚不可

我所說姪不欲 無法行不內觀

雖聞惡不受猷 內不止不計苦

見外好筋皮裹 尊云何當受是

內外行覺觀是 於黠邊說癡行

亦見聞不爲黠 戒行具未爲淨

不見聞亦不癡 不離行可自淨

有是想棄莫受 有莫說守口行

彼五惱聞見棄 慧戒行莫望淨

世所見莫行癡 無戒行彼想有

可我有墮冥法 以見可誰有淨

諦見聞爾可謂 諦意取可向道

往到彼少不想 今奈何口欺尊

等亦過亦不及 已著想便分別

不等三當何諍 悉已斷不空計

有諦人當何言 已著空誰有諍

邪亦正悉無有 從何言得其短
捨欲海度莫念 於隈縣忍行點
欲已空止念想 世邪毒伏不生
悉遠世求敗善 尊言離莫與俱
如水華淨無泥 重塵土不爲萎
尊安爾無所貪 於世俗無所著
亦不轉所念想 行如度不墮識
三不作墮行去 捨不教三世事
捨不想無有縛 從黠解終不懈
制見想餘不取 便歎聲步三界

佛說是義足經竟比丘悉歡喜

異學摘飛第十

聞如是佛在王舍國多烏竹園中爲國王大臣長者人民所敬事以飯食衣被卧床疾藥共所當得時梵志六世尊不蘭迦葉俱舍摩揭梨子先跪鳩墮羅知子稽舍今波梨羅謂婆加遮延尼烏若提子是六尊亦餘梵志共在講堂議言我曹本爲世尊國王人民所待敬云何今棄不復見用悉反承事沙門瞿曇及弟子念是釋家子年尚少學日淺何能勝我曹但當與共試道乃知勝弱耳至使瞿曇作一變我曹作二

瞿曇作十六我曹作三十二轉倍之耳便共與頻沙
王近親大臣語重謝令達我曹所議變意大臣卽便
宣白王如語王聞大瞋恚數諫通語臣已便還歸里
舍衆梵志忽見佛獨得待敬巍巍便行到王宮門上
書具說變意王卽現所尊六人向瞋恚大罵王已見
諦得果自證終不信異學所爲便謂傍臣急將是梵
志釋逐出我國界去梵志見逐便相將到舍衛國佛
於王舍國教授竟悉從衆比丘轉到郡縣次還舍衛
國祇洹中梵志等不忍見佛得敬巍巍便聚會六師
從諸異學到波斯匿王所具說其變意王卽聽之便

乘騎到佛所頭面著佛足竟一面坐叉手求願諾世
尊道德深妙可現變化使未聞見者生信意已聞見
者重解使異學無餘語佛語王言却後七日當作變
化王聞歡喜繞佛三匝而去至期日便爲作十萬座
牀亦復爲不蘭等作十萬座牀息時舍衛人民悉空
城出觀佛出威神時梵志等便各就坐王起白佛諾
世尊可就座現威神是時般識鬼將軍適來禮佛聞
梵志欲與佛搃道便作飄風雨吹其座復雨沙礫上
至梵志膝者至髀者佛便出小威神使其座中悉火
然燄動八方不蘭等見佛座然如是悉歡喜自謂道

德使然佛現神竟燄然則滅梵志等乃知非其神所爲便向內憂有悔意佛卽起師子座中有一清信女俱現神佛言不須自就座吾自現神足貧賤清信士須達女作沙彌名專華色與目犍蘭俱往白佛世尊不宜勞威神我今願與之共摘道佛言不須且自還坐我自現神足佛意欲使衆人得福安隱悉愍人天令得解脫復伏梵志等亦爲後世學者作慧使我道於未來時得住留佛時現大變神足從師子座飛起往東方虛空中步行亦箕坐倚右脅便著火定神足出五色光悉令作雜色下身出火上身出水上身出火下身出水卽滅乃從南方來復滅乃從西方來復滅乃從北方虛空中住變化所作亦如上說坐虛空中兩肩各出一百葉蓮華頭上出千葉蓮華華上有佛坐禪光明悉照十方天人亦在空中散華佛上皆言善哉佛威神悉動十方佛卽攝神足還師子座是時梵志等默然無願皆低頭如鳩睡時持和夷鐵便飛於虛空見燄煙然可畏但使梵志等見耳適現子曹便大恐怖戰慄衣毛皆豎各各走佛便爲兩衆人廣說經法說布施持戒善見天徑薄說愛欲好痛說

其災害著苦無堅固佛以慧意知衆人意輒住不轉便爲說四諦中有身歸佛者歸法者歸比丘僧者有長跪者受戒者有得溝港者得頻來者得不還者是時人民皆共生意疑何因緣棄家爲道復有鬪訟佛卽知子曹疑便化作一佛著前端正有三十二相衣法衣弟子亦能作化人化人語弟子亦語佛語化人默然化人語佛默然何以故正覺直度正所意故化佛卽右膝著地向佛又手以偈難問言

鬪訟變何從起
致憂痛轉相毀
起妄語轉相毀
本從起願說佛

坐憂可起鬪訟
轉相嫉致憂痛

欲相毀起妄語
以相毀鬪訟本

世可愛何從起
轉世間何所貪

從置有不復欲
從不復轉行受

本所欲著世愛
以利是轉行苦

不捨有從是起
以故轉後復有

隨世欲本何起
從何得別善惡

從何有起本末
所制法沙門說

亦是世所有無
是因緣便欲生

見盛色從何盡
世人悉分別作

所從欺有疑意

亦是法兩面受

念從何覺慧跡

願解法明學說

所有無本從何

無所親從何滅

盛亦滅悉一義

願說是解現本

有亦無著細軟

去來滅無所有

盛亦滅義從是

解現賢本盡是

世細軟本從何

著世色從何起

從何念不計著

何緣因著可色

名色授著細軟

本有有色便起

寧度癡得解脫

因緣色著細軟

從何得捨好色

從衆愛從何起

所著心寧悉盡

諦行知如解脫

不想想不色想

非無想不行想

一切想斷不著

因想本虧隨苦

我所問悉已解

今更問願復說

行漚悉成具足

設無不勝尊德

是極正有何邪

向經神得果慧

尊行定樹林間

無有餘最善說

知如是一心向

尊已著不戒行

疾行問度世間

斷世捨是彼身

佛說是義足經竟比丘悉歡喜
佛說義足經卷上

音釋

穢

胡郭切

穢

音遂秀也

穢

部禮切

穢

於危禮切

穢

黃也

穢

古閑

穢

切草

踝

慈庾切

踝

與聚

踝

牛何切

踝

蟲名

踝

嗟亞切

踝

典禮切

踝

瘞黃也

踝

也

卹

雪律切

卹

愁也

卹

勤曰勞撫

卹

勤曰休

卹

居又切

卹

象余鼈切

卹

勇同健也

卹

憚貧涉切

卹

昨

惻

同邑落也

惻

惻也

惻

誣也

惻

誣也

惻

誣也

惻

誣也

惻

誣也

惻

誣也

惻

惻也

微

古吊切

微

嗟也

咤

丑亞切

咤

誰也

廬

馬舍也

廬

也

廬

也

廬

也

廬

也

廬

也

廬

也

廬

也

廬

也

佛說義足經卷下

吳優婆塞支謙譯

猛觀梵志第十一

聞如是佛在釋國迦維羅衛樹下從五百比丘悉應真所作已具已下重擔聞義已度所之生胎滅盡是時十方天下地神妙天來佛所欲見尊德及比丘僧是時梵四天王相謂言諸學人寧知佛在釋國迦維羅衛樹下從五百真人復十方天地諸神妙天悉來禮佛欲見尊威神及諸比丘我今何不往見其威神四天王即從第七天飛下譬如壯士屈伸臂頃來到

佛邊去不遠便俱往禮佛及比丘僧各就座一梵天就座便說偈言

今大會於樹間

來見尊皆神天

今我來欲聽法

願復見無極衆

二梵天適就座便說偈言

在是學當制意

直學行知身正

如御者善兩轡

護眼根行覺意

三梵天就座便說偈言

力斷七伏邪連

意著止如鐵根

捨世觀淨無垢

慧眼明意而彌

四梵天就座便說偈言

有以身歸明尊

終不生到邪冥

捨人形後轉生

受天身稍離患

是時座中有梵志名爲猛觀亦在大衆中意生疑信因緣佛知猛觀梵志所生疑是時便作一佛端正形類無比見者悉喜有三十二大人相金色復有光衣法大衣亦如上說便向佛又手以偈歎言

人欲念彼亦知

各欲勝慧可說

有能知盡是法

遍行求莫隅解

取如是便生變

癡計彼我善慧

至誠言云爲等

一切是善言說

不知彼有法無

冥無慧墮彼點

冥一切痛遠黠

所念行悉彼有

先計念却行說

慧已淨意善念

是悉不望黠減

悉所念著意止

我不据是悉上

愚可行轉相牽

自見謹謂可諦

自己癡復受彼

自說法度無及

以自空貪來盜

已入冥轉相冥

學何故一不道

一諦盡二有無

知是諦不顛倒

謂不盡諦隨意

以故學一不說

何諦是餘不說

當信誰盡餘說

饒餘諦當何從

從何有生意識

諦無餘何說饒

從異想分別擇

眼所見爲著可

識若欺盡二法

聞見戒在意行

著欲黠變訟見

止校計觀何羞

是以癡復授彼

癡何從授與彼

彼綺可善黠我

便自署善說已

有訟彼便生怨

常自恐語不到
見彼諦邪慙藏
以悉知點分別
是爲諦住乃說

如是取便亂變
從異行得解淨
是異學聞坐安
自己盛堅防貪

雖教彼法未淨
諦住釋自在作

我常戒見是辟
本自有慚藏點
癡悉無合點行
悉可淨自所法

自因緣痛著汙
彼雖淨不至盡
自貪俱我堅盛
有何癡爲彼說

生計度自高妙
雖上世亦有亂

棄一切所作念

妙不作有所作

佛說是義足經竟比丘悉歡喜

法觀梵志第十二

聞如是佛在釋國迦維羅衛樹下與五百比丘俱皆應真所作已具已下重擔以義自證會胎生盡爾時十方天地神妙天亦來禮佛欲見尊德及比丘僧是時第七天四天王相謂言諸學人寧知佛在釋國迦維羅衛樹下從五百真人復十方天地神妙天悉往禮欲見尊威神及比丘我曹今何不往見其威神四天王卽從第七天飛下譬如壯士屈伸臂頃來到佛

邊去尊不遠便俱往禮佛及比丘僧各就座一梵天就座便說偈言

今大會於樹間來見尊皆神天

今我來亦聽汝願復見無勝衆

二梵天就座便說偈言

在是學當制意真覺行知身正

如馭者善持轡護眼根行覺意

三梵天就座便說偈言

力斷七拔邪連意著止如鐵根

捨世觀淨無垢黠根明意服輒

四梵天就座便說偈言

因是身歸明尊終不生到邪冥

捨人形轉後尊受天身稍離患

是時座中有梵志名法觀亦在大衆中因緣所計見於泥洹脫有者肢體以故生意疑信因緣佛知法觀梵志所生疑是時便作一佛端正形類無比見者悉喜有三十二大人相金色復有光衣法大衣亦如上說便向佛叉手以偈歎言

如因緣見有言如已取悉說喜

一切彼我亦輕亦或致在善緣

少自知有慚羞

諍變本說兩果

見如是捨變本

願觀安無變處

一切平亦如地

是未嘗當見等

本不等從何同

見聞說莫作變

倚著是衆可惡

可見聞亦所念

兩出淨誰爲明

愛未除身復身

以戒攝所犯淨

行諦祥已具住

於是寧經至淨

可恐世在善說

巴離諦更求行

悉從罪因緣受

亦如說力求淨

自義失生死苦

行力求亦不說

明如行亦思惟

死生無盡從是

如是慧亦如說

戒彼行一切捨

罪亦福捨遠去

淨亦垢不念覺

無玷汙淨哀受

修是法度彼一

說無行爲遠欺

受如是便增變

各因諦世邪利

自所法便稱具

見彼法詰爲漏

無等行轉相怨

自見行不墮汙

凡所說黠代恐

無於法有所益

無慧衆異說淨

所繫著住各堅

各尊法如聞止 演如解自師說
無法行但有言 彼所淨因一心
言如是彼亦說 一所見從淨墮
便自見怨所作 坐勝慧自大說
所攝著求便脫 念所信無所住
本所因在好說 淨行在彼未除
觀世人見名色 以其智如受知
欲見多少我有 不從是善淨有
有慧行累無有 知亦見正以取
見無過是法行 度是亂不更受

慧意到無所至 不見堅識所覺
如關閉制所著 但行觀無取異
尊斷世所受取 取與生不應堅
靜亦亂在觀捨 在是惡哀凡人
棄故城新不造 無所欲何所著
說邪信勇猛度 悉已脫世非生
一切法無所疑 悉見聞亦何念
捨重擔尊正脫 不願過常來見
佛說是義足經竟比丘悉歡喜
兜勒梵志第十三

聞如是佛在王舍國於梨山中爾時七頭鬼將軍與
鴟摩越鬼將軍共約言其有所治處生珍寶當相告
語爾時鴟摩越鬼將軍所治處池中生一蓮華千葉
其莖大如車輪皆黃金色鴟摩越鬼將軍便將五百
鬼來到七頭鬼將軍所便謂七頭言賢者寧知我所
治池中生千葉蓮華但莖大如車輪皆黃金色七頭
鬼將軍卽報言然賢者寧知我所治處亦生神珍寶
如來正覺行度三活所說悉使世人民得安雄生無
上法藥堅無比已生寶何如賢者寶復以月十五日
說戒解罪鴟摩越鬼將軍報七頭言

今十五大淨夜明如日光求尊作何方
不著在何處尊今在王舍教授摩竭人
一切見斷苦洞視是現法從苦復苦生
斷苦不復生徑聞八通道無怨甘露欲
今往具禮敬卽是我所尊行意學以作
一切有無止寧有憎愛不所念意乃隨
意堅於行住已止無所有憎愛無所在
念空無所隨寧貪不與取寧依無惱害
寧捨有直行寧惠無所著捨貪不與取
愍哀及蠕動斷念不邪著覺痛當何親

789101234567892012345678930123456

寧守口不欺 斷嫉無麤聲 守正不讒人

無念鬪亂彼 守口心不欺 不嫉麤聲斷

守行何讒人 悉空彼何亂 寧不染愛欲

意寧淨無穢 所著寧悉盡 在法寧惠計

寧度至三活 所行悉已淨 一切斷不著

寧至無胎世 三活諦已見 所行淨無垢

行法悉成就 從法自在止 尊德住悉善

身口悉已上 尊行定樹間 俱往觀瞿曇

真人鹿蹲腸 少食滅邪貪 疾行問度法

斷痛從何脫 觀瞻如師子 恐怖悉無有

七頭鬼將軍及鳴摩越等各從五百鬼合爲千衆俱
到佛所皆頭面禮佛住一面鳴摩越鬼將軍便白佛
言

真人鹿蹲腸 少食行等心 尊行定樹間

吾人問瞿曇 是痛從何減 從何行脫痛

斷疑問現義 云何脫無苦 斷苦痛使滅

行是痛苦盡 捨疑妙說持 如義無有苦

誰造作是世 誰造作可著 誰造世所有

誰造爲世苦 六造作是世 六造作可著

六造世所有 六造爲世苦 誰得度是世

6 7 8 9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5

晝夜流不止 不著亦不懸 深淵誰不沒
 一切從持具 從慧思想行 內念著意識
 是德無極度 已離欲世想 色會亦不往
 不著亦不懸 是乃無沒淵 從何還六向
 何可無有可 誰痛亦想樂 無餘滅盡去
 是六還六向 是生不復生 名滅已無色
 已盡有何餘 大喜步往道 大將軍七頭
 會當報重恩 開導現大尊 法施無有上
 今鬼合千衆 悉能叉手住 一切身自歸
 爲世尊大歸 今已辭求過 各還國政治

今悉禮正覺 念法歸尊法

爾時座中有梵志名兜勒亦在衆中便生意於泥洹
 脫者肢體因緣因是便意生疑佛卽知兜勒意生所
 疑便化作一佛端正形好無比見莫不喜者形類過
 天身有三十二大人相紫磨金色衣大法衣弟子亦
 作化人化人適言弟子亦言弟子適言化人亦言佛
 所作化人化人言佛默然佛言化人默然何故一切
 制念度故化佛便叉手偏袒以偈歎言

願問賢神逾曰 遠可靜大喜足
 從何見學得滅 悉不受世所有

6 7 8 9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5

本是欲多現我 從一綺便悉亂
 所可有內愛欲 從化壞常覺識
 莫用是便自見 不及減若與等
 雖見譽衆所稱 莫貢高蹶彼住
 如所法爲已知 若在內若在外
 強力進所在作 無所得取無有
 且自守行求滅 學莫從彼求滅
 以內行意著滅 亦不入從何有
 在處如海中央 無潮波安平正
 一切止住亦爾 覺莫增識與意

願作大慧眼視 已證法復現彼
 願作光仁善恕 諸檢式從致定
 且攝眼左右羞 不受言開閉聽
 戒所味莫貪著 我無所世所有
 身所有若麤細 莫還念作悲思
 所可念便生願 有來恐惠莫畏
 所得糧及飲漿 所當用若衣被
 取足止莫慮後 從是止餘莫貪
 常行定樂樹間 捨是理無戲犯
 若在坐若在卧 閑靜處學力行

莫自恐捐睡臥 在學行常嚴事
棄掩忽及戲謔 欲世好悉遠離
捨兵鑿曉解夢 莫觀宿善惡現
莫現慧於胞胎 悉莫鑿可天親
莫造作於賣買 莫於彼行欺利
莫作貪止縣國 悉莫從彼求欲利
莫樂行不誠說 悉莫行兩面辭
盡壽求慧所行 真持戒莫輕漏
橫來詰莫起怨 見尊敬莫大語
所貪棄不可嫉 捨兩舌恚悲法

所欲言學貪著 莫出聲麤邪漏
無著慚莫從學 所施行莫取怨
聞麤惡不善聲 從同學若凡人
善開閉莫與同 慧及應不過身
知如來諦已正 不戲作著意作
從宴淨見已滅 不戲疑瞿曇教
自致慧不亾法 證法無數已見
常從慧如來學 好不著從是慧
佛說是義足經竟比丘悉歡喜
蓮華色比丘尼第十四

聞如是佛在忉利天上當竟夏月波利質多樹華適
盛好坐柔軟石上欲爲母說經及忉利天上諸天爾
時天王釋迦佛所爲佛作禮便白佛言今當用何時
待遇尊佛告天王用閻浮利時待我天王得教卽禮
佛歡喜而去爾時賢者摩訶目犍連亦在舍衛亦竟
夏月於祇樹給孤獨園中爾時四輩悉到目犍連所
比丘輩比丘尼清信士清信女四輩悉禮目犍連各
一面住便共問目犍連今世正眼爲在何所竟是夏
三月目犍連便告四輩今佛在忉利天上當竟夏三
月念母懷妊勤苦故畱說經及忉利諸天在波利質

華樹下柔軟石上樹高四千里布枝二千里樹根下
入二百八千里所坐石按之卽陷入四寸捨便還復
摩訶目犍連廣復爲四輩說經法便默然諸四輩聞
經歡喜著念便禮目犍連悉去至竟夏三月復衆四
輩皆悉來到目犍連所頭面禮竟悉就坐共白目犍
連善哉賢者學中獨多神足願煩威神到佛所爲人
故禮佛足以我人語白佛聞浮利四輩飢渴欲見尊
善哉我佛愍念世間人願下閻浮利目犍連聞如是
默然可四輩復以經法戒四輩悉歡喜目犍連辭四
輩悉起禮復起繞目犍連而去爾時目犍連便取定

意如壯士屈伸臂頃從闍浮利滅便往天上去佛不遠是時佛在無央數天中央坐說經法目犍連思想如來在天衆中譬如闍浮利佛卽知目犍連意想所念告目犍連言不與世間等迅去卽便去欲使來卽來去來隨我意所念目犍連白佛言是天衆多好甚樂天中有先世一心自歸於佛壽盡來生天上或有自歸法者或自歸僧者壽盡皆來生天上或有先世淨心樂道壽盡來生天上佛言目犍連如是是天中先世一心歸佛歸法歸僧心樂道壽盡皆來生天上爾時天王釋坐在佛前意尊佛語及目犍連所言

卽言賢者目犍連所說實如是先世有身歸佛歸法歸比丘僧及淨心樂道皆來生天上是時有八萬天坐在天王釋後諸天悉欲尊佛所言及目犍連亦其王所言便言賢者目犍連可所說者實如賢者言其有先世作人時身歸三正淨心樂道壽盡皆來生天上爾時八萬天因緣目犍連各自陳我得溝港目犍連便前作禮頭面著佛足便白佛言諾闍浮利四輩飢渴欲見佛善哉願尊愍念世間以時下到闍浮利佛便告目犍連汝且下語世間四輩佛却後七日當從天上來下安詳會於優曇滿樹下目犍連言諾

受教便起作禮繞佛三匝便取定意譬如壯士屈伸臂頃便滅於忉利天卽住闍浮利地上悉告世間人佛却後七日當從天上来下安詳會於優曇滿樹下佛於天上便取定意如力士屈伸臂頃佛於忉利天上至談天爲諸天說經滅於談天卽至兜術天復從兜術天滅卽至不憍樂天化應聲天梵衆天梵輔天大梵天水行水微天無量水天水音天約淨天遍淨天淨明天守妙天玄妙天福德天德淳天近際天快見天無結愛天已說經悉使大歡悅便與天上色天俱下住須大施天從上下悉從二十四天上至第三

天上住悉斂上有色天悉復斂有欲天來至第二天須彌巔上住是時有天子墮彼遲被王教意便化作三階一者金二者銀三者瑠璃佛從須彌巔下至瑠璃階住梵天王及諸有色天悉從佛右面隨金階下天王釋及諸有欲天從佛左面隨銀階下佛及諸無數有色天釋亦諸無數有欲天悉下到闍浮利安詳會優曇滿樹下是使無數人民悉來會欲見佛欲聞法是時蓮華色比丘尼化作金輪王服七寶導前從衆力士兵飛來趣佛是大衆人民及長者帝王遙見金輪王悉下道不敢當前廣作徑路蓮華色比丘尼

6 7 8 9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5

到佛所是時天亦見人人亦悉見天以佛威神天爲下地爲高人悉等天亦無貪意在人人亦無貪意在天時有人貪著樂金輪王是時有一比丘坐去佛不遠便其坐道身意著檢戒比丘見天樂會亦人樂會自生念言是一切無常一切苦一切空一切非我何貪是何願是已是何有比丘卽在座得溝港道已自證佛知人知天知彼比丘生意所念說偈言

有利得人形 持戒得爲天 於世獨爲王

見諦是獨尊

是時蓮華色比丘尼適到佛前便攝神足七寶及兵

衆悉滅不現獨住無髮衣法衣便頭面著佛足佛因到優曇滿樹下坐成布席座適坐便爲大衆人民廣說經法說布施持戒善現天徑說欲五好痛說具惡佛知人意稍輒離麤便現苦諦集盡道諦中有身歸佛歸法歸比丘僧者中有隨力持戒者中有得溝港自證頻來至不還道自證是時賢者躬自在座便起偏袒向佛又手面於佛前以偈讚佛言

今恭敬雄遍觀

見諦現說彼度

常慈哀見福想

然人天得何讚

度無極復道彼

捨恐怖就安樂

廣說法遍照世

間每樂不死安

尊戒海廣無度

義深大善行明

無穢淨垢不著

慧船大度三界

無闕傷無減增

尊不著已行捨

從戒尊三界師

從見世去無還

心住賢無過尊

自在定人天雄

明慧力致金色

何人天不禮尊

師觀世兩衆會

雖觀捨不著過

意觀意無垢心

三界空尊所空

是世行拔後根

定至定趣甘露

今神天服於尊

悉又手觀覺身

已無疑樂法賢

悉知識人天心

亦如行蟲獸心

宴淨然愍苦橐

自恣化在天上

正真定收取易

意制念伏彼信

天人世覺獨尊

道德妙與誰雙

觀尊形何時狀

於三界獨步行

戒義堅若寶山

垂綺願三界怨

捨嫉念無恩愛

慧在定明如日

無瑕穢夜月光

著淨戒現淨行

有淨慧善過淨

7 8 9 10 11 12 13 14 15 16 17 18 19 20 1 2 3 4 5 6 7 8 9 30 1 2 3 4 5 6 7 8 9 30 1 2 3 4 5 6

住淨法現淨光

高山雪見照然

十五夜星中月

今觀尊人天雄

法悉照明天

身相現珞真珠

諦復諦猛善說

自行致本無師

釋家子獨見妙

慧千眼去瘡疣

言盛輒意無麁

出聲悲人天坐

聞尊語甜美法

渴飲飽如流海

取法爾有何非

審奉行到彼安

說議斷後不思

聞尊聲眼每滅

顧念後告冥者

如梵王悉照空

神天尚念世人

神行義無所比

從法計捨世念

尊繫著無餘處

是時賢者舍利弗在衆中座便起坐偏袒又手以偈
歎曰

未嘗見有是者

未嘗聞有說者

尊如是威神天

從兜術來至是

天人世悉擁護

重愛俗如身眼

一切安不爲轉

樂獨行著中央

無憂覺我善行

到上教復還世

7 8 9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5

饒心解壞欲身

惡行出有善義

若比丘有獸心

行有敗有空坐

在樹下若曠野

在深山于室中

若高處下牀卧

來恐怖凡幾輩

行何從悉不畏

或久後所行處

世幾輩彼來聲

若往來在方面

比丘處不著意

所止處寂無響

口已出善惡響

在行處當何作

持戒住行不捨

比丘學求安詳

云何學戒不漏

獨在行常無伴

欲洗冥求目明

欲鼓鞴吹內垢

佛謂舍利弗意有所獸惡及有所著在空牀卧行欲
學如法今說令汝知聽

無恐怖慧不畏

至心學遠可欲

勤蟄蟻亦蛻蟲

人惡聲四足獸

非身法意莫識

無色聲光無形

悉非我悉忍捨

莫聞善貪隣縣

所被痛不可身

恐若各悉受行

是曹苦痛難忍

以精進作巨杵

願綺想念莫隨

掘惡栽根拔止

著愛可若不可

有已過後莫望

存黠想熟成善

越是去避麤聲

忍不樂坐在行

四可忍哀悲法

常何止在何食

恐有痛云何止

有是想甚可悲

學造棄行遠可

有未有苦樂苦

知其度取可止

聞開閉縣國行

麤惡聲應莫願

舉眼之莫妄瞻

與禪會多莫卧

觀因緣意安詳

止妄念疑想斷

取莫邪與無欺

慈哀視莫怨氣

如對見等心行

冥無明從求鮮

被惡語莫增意

故怨詰於同學

放聲言輭若水

愧慚法識莫想

若爲彼見尊敬

有行意離莫受

若色聲若好味

香細滑是欲捐

於是法莫媒著

學制意善可脫

戒遍觀等明法

行有一舊棄冥

佛說義足經竟比丘悉歡喜

子父共會第十五

聞如是佛在釋國從千弟子梵志故道人皆老年悉

得應真六達所求皆具佛從教授縣國轉到迦維羅衛城外尼拘類園中迦維羅衛諸釋聞佛從老年應真千比丘轉行教授已到是國近在城外園中便轉相告語先鷄鳴悉當會自共議言語賢者正使太子不樂道當作遮迦越王我曹悉當爲其民耳今棄七寶作道自致作佛我人今悉取長者家出一人亦從佛求作沙門諸釋如是衆爲復增便從迦維羅衛城出欲見尊德欲聞明法諸釋女人亦復聚會俱到佛所欲聞明法爾時佛取神足定意適定便在空中步行爾時諸釋見佛步行虛空中悉歡喜生敬愛心爾

時悅頭檀王便以頭倚著佛足作禮竟便一面住迦維羅衛民悉不平王爲佛作禮是何法以還禮子王卽聞民悉平已如是王便言諸賢者是太子生時地大動現大光明悉照一切生便行七步無所抱倚便左右視出聲言三界甚苦何可樂者諸天於空中持白蓋覆散摩尼華復鼓五百樂復雨香水灌浴太子諸民爾時我第一爲太子作禮諸賢者太子在園闇浮樹下晨起往坐使得卧樹枝葉悉在太子東作陰禹中至晡樹枝葉悉復在西爲太子作陰樹尚不違太子身諸民爾時我第二爲太子作禮王爾時說偈

言

今爲三勇猛黠

以頭禮遍觀足

初生時動天地

坐樹陰身不露

佛爾時攝神足下坐比丘僧前咸坐上諸釋及釋諸女人皆頭面禮佛各就座王亦就座卽偈歎佛言

象馬駕金車

乘行臺閣間

今足蹈遍地

足云何生服

神足爲我車

恣心無限度

乘是神妙車

世車安可久

素被細輶衣

旣服身形好

金露被身行

是服有何好

王法爲我衣

念世行教授

是服先學造

我已覺如來

本樂高殿舍

隨時造閣樓

今獨宿樹間

恐怖當何依

瞿曇世無怨

造仇姪已斷

脫欲念無憂

無仇當何恐

本食恣意味

金器食香美

今丐乃得食

麤惡有何樂

我先飯法味

棄貪從苦空

悉斷四飯本

哀世故行丐

浴尊以華香

妓女樂從行

起止山樹間

誰當浴明者

樂法戒爲河

淨黠悉在中

鬪極往浴淨

遊度不復還

爾時佛爲王及諸釋女人廣說經法先現布施持戒

現天徑微說善痛道其苦導現達世近親三十七品
從可得安如佛以道意知悅頭檀王意滿喜已住
無亂縛解可爲說善度法便說苦諦集盡道諦佛說
是四諦法王卽在坐開解三毒垢除於法中得諦眼
譬如淨繒投於染中卽受色好王亦入法如是爾時
王見諦疑斷在法開解便起坐向佛又手白言已近
已近已遠已遠今我身歸佛法及比丘僧受我爲清
信士盡形壽悉不犯已淨故釋中亦有身歸佛者歸
法者有歸僧者釋諸女人自歸亦如是中有持不殺
戒者持不盜戒持不婬戒持不欺戒中有遠酒不飲
酒戒爾時悅頭檀王見法甚明見諦無疑在法勇猛
便起坐向佛又手以是義足偈歎言

有戒具當何見 云說言從陰苦
願瞿曇解此說 問正意世雄生

先已行棄重恚 亦不著後求願
來現在亦不取 亦不受尊敬空
未來想不著愛 久遠想亦不憂
行遠可捨細輒 邪見盡少無有
已去恐無畏怖 不可動信無疑
無嫉心樂彼與 行如是愛尊命

能自守不多望 自多得惠無嫉
不惡醜不媿冶 不兩舌捨戲疑
意悉脫無所著 棄目見無綺妄
安詳行能解對 亦不欲斷欲想
不學求所樂欲 悉無有亦不憂
無怨恚捨愛欲 不爲味所可使
不自高我無等 得對毀橫得敬
當行觀止意念 見善惡非次望
去所在無所止 觀向法當何著
欲色空亦無色 從黠計不欲脫

愛已滅乃已息 三界空無樂意
悉解離何從得 多彼海度無憂
不願生見有子 列地行願寶增
來不生去不到 欲何索從何得
悉無能說到處 衆學沙門逝心
悉令求所在處 如觸冒知如去
亦不嫉亦無貪 雖在高等不樂
不樂中下不樂 從法生非法捨
是悉空亦無有 從不得亦不求
莫欲世邪樂人 意已止便到盡

佛說是義足經比丘與悅頭檀王及釋人民悉歡喜
惟樓勒太子第十六

聞如是佛在舍衛國祇樹給孤獨園爾時迦維羅衛
諸釋新起大殿成未能久諸釋悉共言從今以後莫
使沙門梵志釋中衣冠及長者子得先入是殿中先
使佛次及比丘僧入餘人乃當從後入耳爾時舍衛
國王子惟樓勒以事到釋國未及入城便至新成殿
中宿明日入城所欲取竟使還其國諸釋聞太子惟
樓勒在新殿中宿便大不樂瞋恚不解便出聲罵今
奈何令婢子先入是殿便共掘殿中土棄深七尺所

更取淨土復其處便復取牛漚洗四殿惟樓勒太子
聞諸釋不淨惡我掘殿中土七尺所更以新土復其
處悉以漚洗四殿復罵我爲婢子汙是新殿聞內結
悲著心我後把國政者當云那治諸釋從是不久舍
衛國王崩大臣集議徵太子拜爲王惟樓勒王卽問
傍大臣者有不淨惡國王者其罪何至傍臣白言如
是罪至死王言然諸釋不淨惡我諸釋是佛親家至
使佛有恩愛在諸釋者終不能得治子曹罪臣下卽
白言佛棄世欲無恩愛在親屬欲治諸釋罪無所難
王聞白如是卽勅興四種兵象兵馬兵車兵步兵出

7 8 9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5

城引號當攻迦維羅衛城佛以食時持應器入舍衛城求食竟出城下道於釋樹下薄枝葉少陰涼在其下望王興兵行大道遙見佛在薄陰樹下坐卽下車到佛所禮竟住一面白佛言諾今有餘大樹枝葉茂盛多陰涼大樹名爲加旃迦維羅衛多優曇鉢尼拘類佛何以不坐是陰何爲坐是小釋樹少枝葉無陰樹下有何涼佛報言愛其名樂其涼故坐其下王自念言如是者佛續爲有恩愛在諸釋續有助意卽從其處而還兵歸其國佛教授舍衛人民生意欲到迦維羅衛國便從諸比丘卽到釋國於尼拘類園中

教授久頃舍衛國王便復問傍臣左右言若有不淨惡國王者其罪何至諸臣對言如是罪至死王復言諸釋致惡我子曹皆是佛近親佛當有顧念在諸釋我終不得子曹勝臣下復白言我曹悉聞諸沙門言瞿曇姪欲已斷有何恩愛在近親王欲治其罪無以爲難王聞諸臣下白如是卽勅興四種兵引號出城到諸釋國行至冥已近去釋城四十里所因止宿諸釋悉聞舍衛國王興四種兵欲來攻是國近去城數十里恐明日來到卽遣輕足上騎到佛所道是願佛教我曹作何方便佛卽告諸釋堅閉城門王終不能

得勝開門內者惟樓勒王卽殺諸釋不疑是騎人聞
佛教便禮佛上馬如去是時賢者摩訶目犍連在佛
後住便白佛言明慧莫以諸釋爲憂我今欲舉一釋
國移置異天地間若以鐵籠籠之悉一天下共者當
奈之何佛卽告摩訶目犍連言耐能爾當奈其罪何
目犍連言但說有形事無奈無形罪何佛爾時說偈
言

作善惡終無腐 從福樂在冥苦
善惡裁向日出 久遠來身受止
舍衛國王卽摩飾鬪具俱便前當攻釋城諸釋悉共

興四種兵象兵馬兵車兵步兵亦出城欲拒扞惟樓
勒王諸釋亦復摩飾兵當與舍衛國王及兵共鬪尚
未相見諸釋便引弓以利刀箭射斷車當應亦射斷
車輶亦射斷車轂亦截車軸射斷駝亦射斷入人身珠
寶無所傷害舍衛國王大恐怖顧問左右汝曹寧知
諸釋已出城迎鬪死我曹終不得其勝不如早還傍
臣卽白王言我曹先日聞諸釋皆持五戒盡形壽不
犯生至使當死不敢有所傷害有所傷害爲犯戒但
前自可得其勝王卽引兵而前突釋兵陣諸釋見王
前甚進便入城閉門爾時舍衛王以遣人語諸釋舅

氏與我有何仇怨而不開門小欲有所借入卽出城
不久畱諸釋中信佛所言本行經法無疑向道便言
不須開門釋中未淨心歸佛歸法歸比丘僧無諦有
疑便以爲可開門復共言我人不得爾恐是中有外
對我曹悉坐耆老行籌不受籌者爲當不欲內王受
籌者爲欲內王多者我又當隨適行籌悉受不受者
少耳衆人言當開門內王諸釋便開門內惟樓勒王
適入迦維羅衛城便生取諸釋當將出城殺之爾時
釋摩男白舍衛王願天子與我小願王言將軍欲何
願我願今沒是池中頃以其時令諸釋得出城走諸

大臣白言王當與釋摩男願令在水中能幾頃王卽
與其所願釋摩男卽沒池中以髮繞樹根而死王怪
在水甚久便令使者按視釋摩男在水中何等作如
王言往按視之見釋摩男在水底死便還白王天子
寧知釋摩男持髮繞樹根而死王卽絞城中餘釋復
問所生得釋悉死未臣白言悉已象踏殺之王便從
處還國佛以晡時悉告諸比丘俱到逝心須加利講
堂所諸比丘悉言諾佛卽與衆比丘俱到逝心講堂
道經過諸釋死處釋中尚有能語者遙見佛舉聲稱
怨佛聞諸釋悲哀甚痛佛卽謂比丘愚癡人惟樓勒

所作罪不小佛便至諸釋地中化出自然無數牀佛
及比丘悉坐佛爲諸釋廣說經法竟謂比丘言汝曹
意何趣屠者以是作是業以是自生活從是因緣寧
可得樂乘聖象神馬七寶車不比丘對曰終不得佛
言善哉意亦如是不見不聞屠以是業自立可得富
樂何以故屠者無慈心哀意觀瞻諸獸故佛復言比
丘汝曹意何趣鮫獵者及屠牛者以是故作以是業
以是自生活寧得乘神象聖馬寶車恣意富樂不比
丘對曰終不得佛言善哉我亦不聞不見鮫獵屠牛
是業自活可致富樂何以故子曹遠哀無慈觀瞻獸
以是遠樂奈何道此愚癡人乃於向道得果者傷害
之乃知是子亦遠善當生見其從是七日當爲水所
漂比丘以故當慈心莫學傷害心至見燒枉亦莫生
害意佛以是本以是因緣以是義生令弟子悉解爲
曹卷語檢爲後世作明使我經道久住世間佛爾時
說是義足經

從無哀致恐怖

人無世從黠聽

今欲說義可傷

我所從捨畏怖

展轉苦皆世人

如乾水斷流魚

在苦生欲害意

代彼恐疲真樂

一切世悉然燒 悉十方亂無安
自貢高不捨愛 不見故持癡意
莫作縛求冥苦 我悉觀意不樂
彼致苦痛見刺 以止見難可忍
從刺痛堅不遺 懷刺走悉徧世
尊適見拔痛刺 苦不念不復走
世亦有悉莫受 邪亂本捨莫依
欲可狀一切度 學避苦越自成
住至誠莫忘舉 持直行空兩舌
滅恚火壞散貪 捨惱解黠見度

捨憂賈莫睡臥 遠無度莫與俱
綺可惡莫臥住 著空念當盡滅
莫爲欺可牽挽 見色對莫爲服
彼綺身知莫著 戲著陰求解難
久故念捨莫思 亦無望當來親
見在亾不著憂 雖四海疾事走
我說貪大猛弊 見流入乃制疑
從因緣意念繫 欲染壤難得離
捨欲力其輩寡 悉數世其終少
捨不沒亦不走 流已斷無縛結

乘諦力點已駕

立到彼慧無憂

是胎危疾事護

勤力守可至安

已計遠是痛去

觀空法無所著

從直見廣平道

悉不著世所見

自不計是少身

彼無有當何計

以不可亦不在

非我有當何憂

本癡根枝爲淨

後裁至亦無養

已在中悉莫取

不須伴以棄仇

一切已棄名色

不著念有所收

已無有亦無處

一切世無與怨

悉已斷無想色

一切善悉與等

已從學說其教

所來問不恐對

不從一致是慧

所求是無可學

已厭捨無因緣

安隱至見滅盡

上不驕下不懼

住在平無所見

止靜處無怨嫉

雖乘見故不驕

佛說義足經卷下

音釋

鴟

丁腰切
市充切
脣腸也

蹲

他各切
媾拜切
吹

橐

囊橐也
鞞火橐也

蚱蜢

蚱音

所致目連答言汝爲人時客來投止不肯安處見他
止客亦復瞋恚今受華報果入地獄又一鬼問言我
食不噉一斛而不得飽何罪所致目連答言汝爲人
時飯飼衆生初不令足今受華報果入地獄又一鬼
問言我一生已來腹大如甕咽細如針孔不得下食
何罪所致目連答言汝爲人時作聚落主自恃豪強
輕欺百姓强打拍人索好美食今受華報果入地獄
又一鬼問言我一生已來恒患男根瘡爛痛不可言
何罪所致目連答言汝爲人時佛圖精舍清淨之處
行於婬穀今受華報果入地獄又一鬼問言我一生

已來多有兒子皆端正可喜而皆早死念之斷絕痛
不可言何罪所致目連答言汝爲人時見兒殺生助
喜啖肉殺故短命喜故痛毒今受華報果入地獄又
一鬼問言我一生已來有一狗體大牙利兩目赫赤
常來噉我何罪所致目連答言汝爲人時喜將狗獵
殘害衆生無有慈心今受華報果入地獄又一鬼問
言我一生已來有一人持諸利刀常割我肉肉盡便
去須臾復生而復來割痛不可言何罪所致目連答
言汝爲人時喜屠割衆生初無慈心今受華報果入
地獄又一鬼問言我一生已來恒患身體處處皆痛

不可得終何罪所致目連答言汝爲人時好漁獵所
網得魚投之沙土令其苦死今受華報果入地獄又
一鬼問言我一生已來頑無所知何罪所致目連答
言汝爲人時強勸人酒令其顛倒今受華報果入地
獄又一鬼問言我一生已來恒患熱渴行見恒河冥
入其中以除熱渴方入其中身體焦爛肌肉離骨渴
欲飲之一口入腹五藏焦爛痛不可言何罪所致目
連答言汝爲人時喜焚燒山澤殘害衆生今受華報
果入地獄又一鬼問言我一生已來恒患飢渴欲至
廁上取糞噉之廁上有大力鬼以杖打我初不得近
何罪所致目連答言汝爲人時作佛圖主有客比丘
來慳惜不與食待客去後乃行舊僧慳惜僧物故今
受華報果入地獄又一鬼問言我一生已來恒處不
淨臭惱纏身不能得離飢渴之時還食此不淨何罪
所致目連答言汝爲人時作婆羅門子有一道人中
後來就汝乞食汝爾時當作是方便令此道人不復
來乞便取其鉢盛糞著底以飯覆之道人得鉢還至
本處著一面潔漱既訖攝鉢欲食鉢中臭穢不可得
近以是之故墮在地獄汝將來世墮糞屎彌黎地獄
又一鬼問言我一生已來肩上有銅瓶盛滿洋銅一

7 8 9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5

手提瓶以杓取之還灌其頭痛不可言何罪所致目連答言汝爲人時作僧維那知僧事有一瓶酥藏著餘處不行與客僧待客去後乃行與舊僧此酥是招提僧物一切有分慳惜僧物故今受華報果入地獄又一鬼問言我一生已來或登刀山劍樹地獄或墮火坑鑊湯地獄種種受苦無復休已何罪所致目連答言汝爲人時作天祠主烹殺三牲祭祀天神血肉灌灑四方語衆人言汝等祠祀大得吉利作此魔邪之言妖孽之師汝輕欺百姓誑惑父母以是之故果入地獄又一鬼問言我一生已來常吞鐵丸何罪所

致目連答言汝爲人時作沙彌子取淨水作石蜜漿石蜜堅大盜打取少許衆僧未食盜食一口故以是因緣果入地獄汝將來世世常吞鐵丸爾時目連與諸餓鬼說往昔因緣竟還來在耆闍崛山一切大

會聞佛所說稽首奉行

鬼問目連經

雜藏經

東晉釋法顯譯

佛弟子諸阿羅漢諸行各爲第一如舍利弗智慧第一樂說微妙法目連神足第一常乘神通至六道見衆生受善惡果報還來爲人說之目連又一時至恒河邊見五百餓鬼羣來趣水有守水鬼執鐵杖馳驅令不得近於是諸鬼徑詣目連所禮目連足各問其罪因緣有一鬼白目連言大德我受此身常患熱渴先聞此恒水清且涼美歡喜趣之入中洒浴而便沸熱舉身爛壞若飲一口五藏焦爛臭不可當何因緣

78901234567892012345678930123456

故受如此罪目連答言汝先世時作相師相人吉凶少實多虛或毀或譽自稱審諦以動人心詐惑欺誑以求利養迷惑衆生失如意事是故今日雖聞此水清涼且美到不如意此是惡行華報後方受地獄苦報復有一鬼白目連言我常爲大狗利牙赤目來喫我肉遺有骨在風還吹起肉續復生狗復來喫我常此苦何因緣故爾也目連答言汝前世時作天祠主常教衆生殺牛以血祀天汝自食肉是故今日以肉償之此是惡行華報後方受地獄苦果億百千倍也復有一鬼白目連言大德我常身上有糞偏塗漫亦

復喫之何因緣故受如是罪目連語言汝前世時作婆羅門惡邪不信罪福有乞食道人意不欲使更來卽取其鉢盛滿中糞以飯著上持與道人道人得已持還本處以手食飯糞汙其手是故今日受如此罪此惡行華報後方受地獄苦報果復有一鬼白目連言大德我腹極大如甕咽喉手脚甚細如針不得飲食何因緣故受如此苦目連答言汝前世時作聚落主自恃豪貴飲酒縱橫輕欺餘人奪其飲食飢困衆生由是因緣受如此罪此是華報地獄苦果方在後也復有一鬼白目連言我常趣溷欲食糞有一羣鬼

捉杖驅我不得近廁口中爛臭飢困無賴何因緣故受如此罪目連答言汝前世時作佛圖王有諸白衣賢者供養衆僧共設食具若有客僧來汝便粗設麤供客僧去已自食細者以是因緣故糞尚叵得何況好食此是華報耳後當受地獄果復有一鬼白目連言我身上偏滿生舌斧來所舌斷續復生如此不已何因緣故爾目連答言汝前世時作道人衆僧差作蜜漿石蜜塊大難消以斧斫之盜心噉一口以是因緣故斧還斫舌也復有一鬼白目連言我常有七枚熱鐵丸直入我口入腹五藏焦爛出還復入何因緣故受如此罪目連答言汝前世時作沙彌行果蓏子到師所敬其師故偏心多與實長七枚是故受如此罪此是華報後受地獄果也復有一鬼白目連言常有二熱鐵輪在我兩腋下轉身體焦爛何因緣故目連答言汝前世時與衆僧作麁盜心取二番挾兩腋底是故受如此罪此是華報後方受地獄果也復有一餓鬼白目連我丸極大如甕行時擔著肩上住則坐上進止患苦何因緣故目連答言汝前世時作市令常以輕秤小斗而與重秤大斗而取常自欲得大利於己侵剋餘人是故受如此罪是華報地獄苦果

7 8 9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5

方在後也復有一鬼白目連言我常兩肩有眼脣有口鼻無有頭何因緣故目連答言汝前世時恒作魁膽弟子若殺罪人時汝常有歡心以繩著結挽之以是因緣故受如此罪此是惡行華報地獄苦果方在後也復有一鬼白目連言我常有熟鐵針入出我身受苦無賴何因緣故爾目連答言汝前世時作調馬師或作調象師象馬難制汝以鐵針刺脚有時牛遲亦以針刺是故受罪如是此惡行華報地獄苦果方在後也復有一鬼白目連言我身常有火出焦熱懊惱何因緣故爾目連答言汝前世時作國王大夫人

更一夫人王甚幸愛常生妬心伺欲危害值王卧起去時所愛夫人眠猶未起著衣卽生殺心正值作餅有熟麻油卽以灌其腹其腹爛卽死以是因緣受罪如此復有一鬼白目連言常有旋風迴轉我身不得自在隨意東西心常惱悶何因緣故爾目連答言汝前世時常作卜師或時實語或時妄語迷惑人心不得隨意是故受如此罪此是華報地獄苦果在後復有一鬼白目連言我身常如塊肉無有手脚眼耳鼻等恒爲蟲鳥所食罪苦難堪何因緣故爾目連答言汝前世時常與他藥墮他身胎是故受如此罪此是

7 8 9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5

華報地獄苦果方在後耳復有一鬼白目連言常有
 热鐵籠絡我身焦熱懊惱何因緣故受如此罪目
 連答言汝前世時常以羅網掩捕魚鳥是故受如此罪此
 是惡行華報苦果在後耳復有一鬼白目連言
 我以物自蒙籠頭亦常畏人來殺我心常怖懼不可
 堪忍何因緣故爾目連答言汝前世時姪犯外色常
 畏人見或畏其夫主捉縛打殺或畏官法戮之都市
 常懷恐怖相續是故受此罪此是惡行華報後方受
 地獄果耳復有一鬼問曰我受此身肩上常有銅瓶
 满中洋銅手捉一杓取自灌頭舉體焦爛如是受苦

無數無量有何因緣罪咎如此目連答言汝前身時
 出家爲道人典僧飲食以一酥瓶私著餘處有客道
 人來者不與之去已出酥行與舊僧此酥是招提僧
 物一切有分如此藏隱雖與不等由是緣故受此罪
 也目連復見一天女坐一蓮華上縱廣百由旬此華
 獨妙殊於餘者所欲資生之具宮殿飲食隨念欲得
 盡從華出進止隨身目連問言作何善行受報如此
 天女答言迦葉佛滅度後遺零舍利諸弟子輩建七
 寶塔高廣四十里時我作女人出見寶塔中佛像相
 好信敬情發念佛功德脫頭上華奉獻於像以是因

緣故受報獨妙如此舍利弗夏盛熱時遊行至菴羅園中有一客作人汲井水溉灌於樹此人於佛無有大信見舍利弗發小信心喚舍利弗言大德來脫衣樹下坐我當以水澆之不失溉灌兼相利益於是舍利弗脫衣受澆身得安樂隨意遊行此客作人其夜命終卽生忉利天上有大威力次釋提桓因便自念言我何因生此自觀宿命信心微薄因略溉灌計水洒浴舍利弗我若信心純厚知必有報故設浴具以爲供養自惟爲功雖少以遇良因獲報得甚多卽詣舍利弗所散華供養舍利弗因其淨信之心卽爲說

法得須陀洹道目連復見一神身體極大有金色手五指常流甘露若有行人所須飲食資生之具盡從指出恣而與之目連問言汝是何天福報功德奇特乃爾天王答言我非忉利天王乃至非第六天王亦非梵天王我是大鬼神乃依其國大城住爲遊行觀看故來至此目連問言汝作何善行得如此報答言彼國大城名曰羅樓我昔在中作貧女人又織毛縷囊賣以自活居計轉貧屋舍壞盡遂至陌頭近一大富好施長者家織囊自活日欲中時若有沙門婆羅門持鉢乞食問我言某長者家爲在何處我心真實

無有虛妄歡喜舉手指示其家言彼處去日時過勿復餘求以是因緣故得如是貧女人以隨喜心助行施者得報如此況實行布施者也佛在世時有五大國王迦葉佛時爲善知識出家爲道釋迦文佛出世皆得道迹今說一王時得道因緣國名槃提王名憂達那其國殷富人民熾盛王有二萬夫人第一夫人字月明容儀端正王甚愛敬王時大會作衆妓樂命月明舞月明夫人衣以上服金銀名寶縷珞其身舞甚奇雅悅衆歡情王善能相見其夫人將終相現不過半歲奄然殞逝恩愛離苦憂感不視月明怪而問之王以死事大故恐其憂惱隱而不說慇懃重問王便答言汝壽命短將終不久愛離之情是故愁耳月明白言夫生有死自世之常何獨憂耶若顧隆念但相告示見放出家王善其言聽其入道王欲證明果報增益信心與之結誓語言汝若出家持戒思惟設未成道必生天上生天上已還至我所聽汝出家月明卽許其誓於是喚諸比丘尼卽度將去以貴重能捨五欲多來問訊恭敬供養妨其道業是故遊行諸國從出家日數滿六月持戒清淨勤思惟道眾惡世間得阿那含道於一聚落命終卽生色天上觀昔因

緣於王有要要赴本誓觀王沒於五欲懶悞難化直爾而往無以感發宜以恐逼爾乃降伏便自變身作大羅刹衣毛振豎執五尺刀因王夜靜臥去之不遠在虛空中王覺已甚大怖畏語言汝雖有士衆千萬今唯屬我不得自在死時已至何緣得濟王卽報言我無因緣惟恃本所作善修心清淨死生善處天可之言如此因緣最爲可恃更無餘理王便問言汝是何神使我大怖畏退縮天答我是月明夫人王放出家思惟離欲生色天上下來赴約王言汝雖說此我猶不信復汝本形爾乃可信天卽變形如本月明

裳服飾如本在王邊立王欲心發卽起欲捉月明念言此人欲態不淨何可近之於是卽還上昇虛空爲王說法語王此身無常彈指叵保譬如朝露日出則滅不惟無常貪著於身王不見盛壯華色老所吞滅諸根朽邁口禱不明耳聽不聰形敗腐朽無所復直譬如醞酒綴取淳味糟無所直三身旣老無可貪樂遺有死在是身旣生死常與俱王不見胎中死者出胎死者壯時死者老時死者是身危脆死賊常隨須臾叵信身心火然但是衆苦者是衆生心有三毒憂惱身有寒熱飢渴衆患而不生貪著我身宮人妓

女華色五欲國財妻子悉非我有死至之時無一隨去身自尚棄何況餘物生死憂喜無一可奇凡細愚闇迷沒五欲迴流生死莫知出路王是智人何不厭離出家求道王時善心生許其出家月明重化之曰君當出家當求好師當聞妙法聞妙法已受而修行日夕精進翹勤勿懈說此語已忽然不現王至天明禪位太子捨離五欲投迦旃延出家爲道時人以其國王捨重榮利求正真道臣吏人民多來供養恭敬問訊妨修道業於是遊行至摩竭國佛爲說法得阿羅漢道諸根淨默無所求欲執持瓦鉢入王舍城乞

得宿飯齋還林中坐草而食萍沙王出遊遇見詣林問訊汝本爲王出入榮從槌鐘鳴鼓人民聚落貲輸庫藏珍奇資生自然今作乞兒獨行乞食豈可樂耶汝還罷道相與分半國治道人答言我大國王聚落甚多今復何緣捨大就小非我所宜萍沙王復問汝本食以上味盛以寶器今執瓦鉢乞殘宿飯不亦難乎汝本爲王勇夫將士侍衛今日單獨豈不恐怖汝本在深宮夫人后妃妓女娛樂好聲妙色盈悅耳目坐以寶牀敷以綻綻細褥今日飄然獨宿林野臥敷草蓐豈不苦哉道人報言我以此知足無所貪樂萍

沙王言汝是可憐之人道人答曰汝是可憐人非我也所以者何汝爲五欲所纏恩愛所驅使不得自在
我今心意靜悅無欲自在快樂種種爲萍沙王說法
已王卽還去問曰此四衆皆好佛道欲行菩薩三事
有欲一日一夜行者有欲七日行者乃有終身行者
爲得幾許福耶答曰此問甚深我不能答惟佛能知
此福多少自捨如來不能了也如月氏國王欲求佛
道故作三十二塔供養佛相一作之至三十二時
有惡人觸王王心退轉如此惡人云何可度卽時迴
心捨生死向涅槃作三十二佛圖以求解脫由是因

緣成羅漢道是故此寺名波羅提木叉此言解脫生死自爾
已來未滿二百年此寺今在吾亦見之寺寺皆有好
形像王去世後一人得菴羅樹華其色如金是人得
好華欲爲首飾卽自惟念此頭無常壞時狐狗食噉
糞土同流何用嚴飾卽持入佛塔見佛像相好心生
念言此是釋迦牟尼佛像相好續念佛功德佛是一
切智人大慈大悲十力四無畏等功德念已心熟毛
豎卽以華上佛上佛已念言雖聞佛說一華供養佛
得大報不知齊限多少卽出見勸化道人問言以一
華散佛得幾許福德答言我狀世苦捨五欲出家受

6 7 8 9 10 11 12 13 14 15 16 17 18 19 20 1 2 3 4 5 6 7 8 9 30 1 2 3 4 5 6 7 8 9 30 1 2 3 4 5

戒而已不讀經書如此深事我不能知當問讀經聰明者卽往問讀經道人答言我如畫師隨所聞見無有天眼神通不能知見善惡果報卽示坐禪道人可往問坐禪道人上座是六通羅漢必知此事卽便往問念佛功德心熱毛豎以一華散佛得幾福德阿羅漢卽爲觀之捨此身已次第受天上人中福德一世至千萬億世從一大劫乃至八萬大劫福猶不盡過是以往不能復知阿羅漢自以衆所推舉一華果報云何不知卽語此人小住語已遣化身至兜率天上請彌勒所具稱賢者所說表之彌勒得幾許果報彌

勒答言不能知正使恒河沙等一生補處菩薩尚不能知況我一身所以者何佛有無量功德福田甚良於中種種果報無盡待我將來成佛乃能知之

雜藏經

7 8 9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5

懸殊經

金中蘇蘇果報經
詛言大鬼一鬼也以昔而報言無事以
博答言不詛言五財可同心等一主
財可同心等一主

餓鬼報應經

山雜經

失譯人名附東晉錄

尊者大目犍連從佛在耆闐崛山遊恒水邊見諸餓鬼甚多受罪不同見尊者目連皆起敬心來問因由一鬼問言我常苦頭痛不知何罪所致目連答言汝本爲人時不能修善以杖打衆生頭今受華報果在地獄一鬼問言我常患瘡痛何罪所致目連答言汝爲人時無有慈心焚燒山林殘害衆生今受華報果在地獄一鬼問言我舉身瘡爛痛不可堪何罪所致答言汝爲人時生燄猪羊今受華報果在地獄一鬼

問言我食無有足時初不得飽何罪所致答言汝爲人時雖飯食衆生初不令足今受華報果在地獄一鬼問言我苦頭痛治之叵差何罪所致答言汝爲人時不敬道德加以罵辱今受華報果在地獄一鬼問言我生男女皆悉端正而皆早死念之斷絕何罪所致答言汝爲人時見兒殺生助其歡喜共噉其肉殺故短命喜故痛毒今受華報果在地獄一鬼問言我有一夫而畜多婦我應直宿而不見納何罪所致答言汝爲人時不敬夫主邪淫無禮今受華報果在地獄一鬼問言我常頭痛而男根瘡爛何罪所致答言

汝爲人時於塔廟清淨之處行姪今受華報果在地獄一鬼問言我得此身麤澀不淨何罪所致答言汝爲人時不尊有德輕賤善人而以沙土枕坐沙門今受華報果在地獄一鬼問言我食不啻一斛而常不足何罪所致答言汝爲人時本作比丘爲僧求物而以自食今受華報果在地獄一鬼問言我受此形脚腫項瘦何罪所致答言汝爲人時使人及諸畜生負重無道今受華報果在地獄一鬼問言我受此身常患熱渴何罪所致答言汝爲人時喜好漁獵以所得魚投之沙土令其苦死今受華報果在地獄一鬼問

言我受此身癡狂無知何罪所致答言汝爲人時以酒施人今受華報果在地獄一鬼問言我所生子皆反噉我何罪所致答言汝爲人時不修孝養今受華報果在地獄一鬼問言我食常吐何罪所致答言汝爲人時有人中後索食者汝瞋詈而與今受華報果在地獄一鬼問言我今一生資財無乏而樂著弊故何罪所致答言汝爲人時雖好布施施後尋悔今受華報果在地獄一鬼問言我今一形恒倚巷陌宿無常處何罪所致答言汝爲人時客來投止而不安隱見他客止而復瞋罵今受華報果在地獄一鬼問言我得此形非男非女何罪所致答言汝爲人時而無慈心好健六畜今受華報果在地獄一鬼問言我得此身健不能行何罪所致答言汝爲人時好行無道拘繫於人及以禽獸令不得行今受華報果在地獄一鬼問言我此一身常患熱渴行見恒河清涼甚好入中洒浴冥得涼樂以除熱苦方入其中舉身爛壞渴欲飲之一口入咽五藏焦爛肌肉離骨何罪所致答言汝爲人時好爲相師相人吉凶少實多虛或毀或譽自稱有德以動人心以求利養又於父母兄弟宗親詭僞不實今受華報果在地獄憂苦叵言說不

7 8 9 10 11 12 13 14 15 16 17 18 19 20 1 2 3 4 5 6 7 8 9 30 1 2 3 4 5 6 7 8 9 30 1 2 3 4 5 6

可盡也一鬼問言我受身已來常有一狗體大牙利
兩目赤晝夜常來而噉我身命未盡頃肉便復生
復受此苦痛不可堪忍何罪所致答言汝爲人時作
天祠主於天祠中取牛羊血以祀於天自食其肉語
衆人言汝等祠祀大得吉利作惡邪罪以惑百姓今
受華報果在地獄一鬼問言我受此身常處不淨舉
身塗漫有所噉食皆是不淨恒受此苦不能得離臭
惱纏身憂患叵計何罪所致答言汝爲人時作婆羅
門不信佛法不樂供養沙門道人客來乞求恒不欲
見時有一道人來從汝乞汝作是念當作方便令不

復來卽取鉢盛屎著下以飯覆上持與道人得已還
至本處持著一面淨洒手訖坐而執鉢取飯食之鉢
中不淨臭不可近以是因緣受此臭惱今受華報果
在地獄當吞鐵丸身體爛壞苦不可言一鬼問言我
受此身處處舌出有自然斧而斬截之如是無數何
罪所致答言汝爲人時作小道人爲僧所差取清淨
水作石蜜漿分與衆僧石蜜堅大打取少許而盜食
之一口盜僧物故今受華報果在地獄吞於洋銅苦
不可說一鬼問言我受此身常苦飢餓往至廁上欲
取屎食廁上有大力鬼以杖打我初不得近何罪所

7 8 9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5

致答言汝爲人時曾作道人爲佛圖王惱護僧物不以好食供養衆僧常以麤惡與之或時欲作好食見客比丘來便止不作待去乃設惡心慳惜今受華報果在地獄一鬼問言我受此身腹大如甕餘身分皆小咽如針孔不得下食何罪所致答言汝爲人時作聚落主自恃豪強欺凌人民常以無道索人飲食以苦百姓今受華報果在地獄一鬼問言我受此身肩上有銅鋌滿中洋銅手捉一杓以酌取之自灌其頭舉身焦爛如是無數苦痛無量何罪所致答言汝爲人時出家修道知僧飲食取一酥瓶藏著餘處客道

人來而不與之客去出酥瓶行與舊僧此酥是招提僧物一切有分以隱匿僧物與不平等以是因緣得如是苦今受華報果在地獄苦痛難計一鬼問言我受此身常有人來持諸刀鋸剥刺我身又破我腹出其五藏肉盡筋斷痛不可忍受須臾之間肉生平復尋復來割何罪所致答言汝爲人時作婆羅門不信正法常生邪見奉事天神恒以牛羊禱祀以是罪故今受此苦此是華報果在地獄一鬼問言我受此身常有人來持諸刀鋸割剥我身又破其腹出其五藏肉盡筋斷苦切叵忍須臾之間肉生平復尋復來割

何罪所致答言汝爲人時常作魁牘主知殺人無有慈心歡喜行之有如是罪得此苦痛今受華報果在地獄一鬼問言我受此身兩腋下恒有熱鐵輪行時輪轉火熱逼身兩腋下焦爛何罪所致答言汝爲人時出家學道與僧種種餅僧未下食汝時貪心盜取僧餅藏著腋下屏處食之以是因緣得如是苦今受華報果在地獄受苦難量一鬼問言我受此身常有自然赤鐵丸從空中下入口至腹或左出右入右出左入舉身焦爛無量何罪所致答言汝爲人時出家爲沙彌爲僧煮菴羅果僧中行之至和上前長與七

枚以是因緣故得惡苦今受華報果在地獄一鬼問言我受此身意欲行來發動迴還猶如旋風初不得前愁惱悶苦不可稱計何罪所致答言汝爲人時作上問師詭詭他人令心幻惑或喜或怖皆不真實由此因緣得如是惡今受華報果在地獄一鬼問言我受此身內常有熱猶懷湯火復來燒煮苦痛萬端何罪所致答言汝爲人時作國王第一夫人時王偏敬小夫人汝常生嫉心作惡方便求欲殺之伺其臥時煮酥令熟注著腹上其人得此苦痛無量遂致命終由是因緣得如是苦今受華報果在地獄一鬼問言

言我受此身性多恐怖常畏人來收閉繫縛加諸楚
毒初無歡心何罪所致答言汝爲人時好行邪姪犯
人婦女常畏發覺心不自寧今受華報果在地獄或
臥鐵牀或抱銅柱如是之罪不可稱計一鬼問言我
受此身自然熟鐵而有籠網纏絡我身燒熱焦爛痛
毒叵言何罪所致答言汝爲人時常持骨網殺諸魚
獸籠取飛鳥以是因緣得如是苦切今受華報果在
也伏一鬼問言我受此身無有手足如一段肉在於
曠野狐狸虎豹鷙鷺衆鳥競來搏撮爭共食之苦痛
叵言何罪所致答言汝爲人時作惡方便若已若他

妊娠之時卽便與藥令胎消化由是因緣得如是苦
今受華報果在地獄又三鬼一時來問言我受此身
常有鐵釘從空中下釘我身上入肌破骨痛苦徹髓
何罪所致答言汝爲人時一人作馬師一人作牛師
一人作象師苟貪他財鍼刺無道使受痛苦而不除
痛由是因緣得如是苦今受華報果在地獄一鬼問
言我受此身無有頭首眼耳鼻口盡在脣前何罪所
致答言汝爲人時若見殺人與之捉頭歡喜而挽無
有慈心由是因緣得如是身今受華報果在地獄目
連答諸鬼已皆生敬心走前懺悔目連見其歡喜更

爲說法諸鬼聞已皆大歡喜

餓鬼報應經

音釋

夔

夔變

怪也

麌

麌也

殞

殞也

醜

醜也

緑

緑也

鍼

鍼也

鍼

鍼也

切

切也

妖

妖也

施

施也

醜

醜也

醜

醜也

施

施也

施

施也

施

切

切也

殞

殞也

殞

殞也

殞

殞也

殞

殞也

殞

殞也

殞

殞也

殞

切

切也

殞

殞也

殞

殞也

殞

殞也

殞

殞也

殞

殞也

殞

殞也

殞

切

切也

殞

殞也

殞

殞也

殞

殞也

殞

殞也

殞

殞也

殞

殞也

殞

切

切也

殞

殞也

殞

殞也

殞

殞也

殞

殞也

殞

殞也

殞

殞也

殞

切

切也

殞

殞也

殞

殞也

殞

殞也

殞

殞也

殞

殞也

殞

殞也

殞

佛教西來玄化應運略錄

宋正議大夫安國軍節度使開國侯程輝編

准五分律說釋迦牟尼佛生中印土迦維羅城刹

帝利家父名白淨飯王母號摩耶右脇而生紫磨

金色不紹王位十九踰城至雪山中六年苦行日

食麻麥又至象頭山學不用處定三年知非遂捨

又至鬱頭藍學非想定三年知非亦捨卽以無心

意而受行悉摧伏諸外道世尊時年三十於二月

八日明星出時成等正覺於鹿野苑中度憍陳如等五人爲教興之始也又准周書異記說周昭王

二十四年甲寅歲四月八日有光來照殿前王問
太史蘇由對曰西方當有大聖人生後一千年教
流此土至後漢孝明帝永平七年正月十五日帝
夜夢金人身長丈六赫奕如日來詣殿前曰聲教
流傳此土帝旦集群臣令占所夢時通人傳毅對
曰臣覽周書異記云西方有大聖人出世滅後千
載當有聲教流傳此土陛下所夢將必是乎帝遂
遣王遵等十八人西訪佛法至月氏國遇摩騰
竺法蘭二菩薩將白氈上畫釋迦像及四十二章
經一卷載以白馬同回洛陽時永平十年丁卯十

二月三十日也因以騰蘭譯經之所名白馬寺後
六年摧伏異道二菩薩踊身虛空爲王說偈曰
狐非獅子類燈非日月明池無巨海納丘無嵩岳
榮法雲垂世界法雨潤群萌顯通希有事處處化
群生

東京大學総合図書館蔵

7 8 9 10 11 12 13 14 15 16 17 18 19 20 1 2 3 4 5 6 7 8 9 30 1 2 3 4 5 6 7 8 9 30 1 2 3 4 5

四十二章經序

聖館文學中奉大夫掌諸頭陀教特賜圓通玄悟大禪師頭陀僧溥光奉勅撰

伏聞無上法王爲一大事因緣出現世間隨機接物演河沙妙義設無量行門運神通四十九年度衆生百千萬億將般涅槃囑累國王大臣宣揚正法續佛慧命斯乃爲未來世衆生作無窮之利益大慈遠被其至矣乎欽惟聖上道貫百王智周庶品每萬機之暇弘崇三寶景仰一乘思所以答列聖在天之靈皇太后鞠育之恩既創建大招提博施諸貝典又以爲四十二章經乃

釋迦如來初成正覺大弟子衆記諸聖言沙門釋子臣寮士庶率可遵行適有以前代注本爲進者特勅有司一新板本遍頒朝野將使或緇或素若見若聞頂戴奉行咸登覺地其深心願心廣大心非聰明睿智孰與於此詔頭陀僧臣溥光爲之序臣溥光幸在空門忝爲佛子夙承隆眷不敢以固陋辭竊惟能仁所演三藏十二分一切脩多羅數等塵沙如華嚴般若寶積大集涅槃等部文富義博事備理周在龍宮海藏爛若日星而騰蘭東邁獨持此經適符漢明西迓聲教之運而大振玄風于天下後世是其可以常

情小度擬議哉意其必有冥數潛通諸佛密證爲震
旦萬世五乘之大本五性之通達妙道至理存乎其
間者歟研其義味蓋爲佛者在日用修進之際造次
顛沛不可須臾離之要旨乎明明天子流布宣揚其
猶捧佛日而曲照昏衢霧法雨而普滋群槁上不負
如來之囑累下廣開叔世之津梁娑婆界中莫大之
良因也昔唐太宗勅書手十人錄遺教經遍付諸郡
用伸勸勉方之今辰其有間矣臣歎詠不足無任歡
喜踊躍焚香再拜書于經之首云

皇慶元年正月 日上

註四十二章經序

宋 真 宗 皇 帝 製

夫至真不宰豈隔於含靈群動無明白迷於正覺是
以慈悲之上聖因談歸救之妙門接物而利生隨機
而演教布法雲而潤物揭智炬以燭幽示忘言之言
爲無說之說四十二章經者蓋能仁訓戒之辭也自
騰蘭之傳譯卽華夏以通行朕嘗以餘閑潛加覽閱
冀協宣揚之誼因形注釋之詞晦朔屢更簡編俄就
導群氓之耳目雖愧精深資衆善之筌蹄庶符利益
其有相傳之疑誤累句之難分亦用辨明庶臻演暢

粗題篇首以達予衷云爾

卷四十一

四

唐

大士真言等句合觀無與自去有子

宋真宗皇帝

唐

佛說四十二章經

佛者梵語佛陀此云爲覺蓋覺悟之義也覺有三義一者自覺勝

夫凡夫汨沒生死無暫覺者故二者佛能覺他勝聲聞緣覺二乘人不能覺他故三者覺行圓滿勝諸菩薩爲菩薩雖行二利行未滿故至佛果位三覺方滿佛口所宣故云佛說四十二章經者卽下文佛因事誠約勸諸弟子成四十二章也經者梵語云修多羅此云爲經經訓常也常者言其真常不易之法也

迦葉摩騰共竺法蘭奉

詔譯

宋真宗皇帝

註

爾時世尊旣成道已作是思惟離欲寂靜是最爲勝住大禪定降諸魔道

夫愛欲長於貪癡禪定資於智慧故世尊首言離欲之最勝次

勤住禪

而降魔

今轉法輪度衆生於鹿野苑中爲憍陳如等

五人轉四諦法輪而證道果

鹿野苑中證道之淨土憍陳如等聞法之弟子

四諦卽苦集滅道也時復有比丘所說諸疑陳佛進止世尊教詔一一開悟合掌敬諾而順尊勑爾時世尊爲說真

經四十二章接物度生隨機演教開彼疑惑示其戒勑叙以輪貫乃成四十二章焉

佛言凡經首標佛言者皆是弟子阿難等辭親出家

爲道識心達本解無爲法名曰沙門沙門梵語合云其二字此云勤息謂能勤修衆善勤息諸惡又云息

惡取止息之義也蓋謂辭其親出其家息諸惡勤諸善乃爲道人也

故名曰沙門常行二百五十戒爲四真道行進志

清淨成阿羅漢二百五十戒其條目具載大藏中小乘律四分戒此不繁云四真道行卽

知苦斷集證滅修道爲四諦真實道行也若堅持清淨進志不退卽漸成聖果也

漢者能飛行變化住壽命動天地梵語阿羅漢此云應應具三義也

應斷煩惱障二應不受後有身三應受人天妙供養既成此聖果能以六通飛行往來又變化形體凡俗莫測住壽命者或生或滅延促自在若要住世久長則經劫不滅又能以神通震動天地蓋妙用難測也

次爲阿那含阿那含者壽終魂靈上十九天於彼得

阿羅漢梵語阿那含此云不還言得此果位斷盡欲界分別更不還來生欲界也故此一報命終生於色界一十九天十九天者謂初禪三天二禪三天三禪三天四禪九天於彼十九天中斷盡煩惱當得阿羅漢

次爲斯陀含斯陀含者一上一還卽得阿羅漢果梵語斯陀含此云一來唯一生

次爲須陀洹須陀洹者七死七生便得阿羅漢梵語須陀洹此云須流

別煩惱初預聖流也七生七死者於七度生死中斷盡煩惱卽得阿羅漢果譬如斷其

四支斷不復用之愛欲斷盡而得聖果者譬如斷其四支更不可續聖流斷其愛欲更

感也
不再生

佛言出家沙門者斷欲去愛識自心源達佛深理悟
佛無爲內無所得外無所求心不繫道亦不結業無
念無作無修無證不歷諸位而自崇最名之爲道能
斷愛欲則心源自明善達深理則法本超悟趣或歸
當道匪外求是以不繫道而道有不結業而業解念
作修證復大

何爲哉

佛言剃除鬚髮而爲沙門受佛法者去世資財乞求
取足日中一食樹下一宿慎不再矣判除鬚髮蓋欲
堵形厭俗飢寒
之患求乞度時故知日中一食樹下一宿自然身心澄靜貪欲不生則可自進其道法也

使人愚蔽者愛與欲也

夫不絕愛欲卽爲前境所轉旣爲境所轉則愛欲習氣依然復生故使

眞智蒙蔽無由證覺矣

佛言衆生

假曰衆生

以十事爲善亦以十事爲惡何

者爲十身三口四意三身三者殺盜婬口四者兩舌

惡罵妄言綺語意三者嫉恚癡

夫爲善者不殺不盜不邪行是爲身之三

善不兩舌不惡口不妄言不綺語是爲口之四善不
嫉恚不癡是爲意之三善若背此者譏搆離間謂之兩舌咒詛毀謗謂之惡罵語無狀貳謂之妄言

誦謔巧詎謂之綺語如賢掩善名之爲嫉恚彼倚怨謂之爲志不憂生死惟

不信三尊以邪爲真

三尊者佛法僧

也優婆塞行五事不懈退

梵語優婆塞此云清信男五事卽五戒也謂不殺不盜不邪行不妄語不飲酒懈退者

十事卽上文十善也得道

謂精勤不退乃證道也

佛言人有衆過而不自悔頓止其心罪來歸身猶水
歸海自成深廣何能免離愚迷之人日作衆罪既無及身若衆流之朝海積彼歲時自成深廣退悔惡積于心致百殃之

後會得道也夫人善自知非能改其過日新之善漸積過去之惡漸消卽於後會得明道也

佛言人愚以吾爲不善吾以四等慈護濟之謂慈悲捨謂之懿無量喜心以護濟愚人我亦復以善心誠之福德之氣常在此也害氣重殃反在於彼我常以德報怨故福德之氣常在於我彼惟以惡行重凌善人故害氣重殃彼自貽惡意來相侵也

重以善往我亦復以善心誠之

也有愚人聞佛道守大仁慈以惡來以善往故來罵佛佛嘿然不答愍之癡冥狂愚使然愚人聞佛守大仁慈乃恣惡辱

罵於佛佛卽嘿然不答蓋惜彼癡愚使如是也

罵止愚人止其罵也

問曰子佛乃問之子者

曰持歸此愚人答也

今子罵我我亦不納子自持歸禍身矣佛乃問彼惡人罵止佛問曰如子施禮於人彼若不納卽子所施禮其理如何愚人對曰我自持歸禍復告曰汝今罵我我亦不納子自持歸禍及汝身

猶響應聲影之追形終無免離慎爲惡也

佛言惡人害賢者猶仰天而唾唾不汙天還汙已身逆風坋人塵不汙彼還坋于身賢者不可毀禍必滅已也姦惡之人害於賢者猶如恐天仰唾徒汙於已逆風坋人惟坋自身如被害賢之人禍終滅已

佛言夫人爲道務博愛博行哀施見彼危厄博德愛人博哀施哀而救之

莫大施 言施之德

夫學道之人

既博愛哀

施

則其福彌大

而能

爲彼歡喜

讚歎亦獲福報

見彼行

施奉道

數千百人各以炬來取其火去熟食除冥彼火如故
福亦如之

質曰者求質其疑也言助之歡喜亦獲其福疑謂滅彼哀施福報佛乃答曰猶如一炬之火有數千百人各以炬來求之或熟飲食或照庭闈而本之一炬亦不減少故哀施福報亦猶於此

覩人施道助之歡喜亦得福報 見彼行施奉道
佛言飯凡人百不如飯一善人飯善人千不如飯持五戒者一人飯持五戒者萬人不如飯一須陀洹飯須陀洹百萬不如飯一斯陀含飯斯陀含千萬不如飯一阿那含飯阿那含一億不如飯一阿羅漢飯阿

羅漢十億不如飯辟支佛一人飯辟支佛百億不如飯一佛學願求佛欲濟衆生也

此十等校量益德有大小障有厚薄故飯

之者福報不同又梵語辟支佛陀此云獨覺故言飯百億獨覺不如飯一佛何者蓋運大慈普濟群生其福深廣不可思議而飯善人福最深重

此言飯凡世善人福亦深

供佛之報亦最大也

佛言天下有二十難貧窮布施難

凡人貧乏自逼

人中有二種或能事天地鬼神或能孝養父母比量福報不及能事親者

斯亦難矣

豪貴學道難

豪貴恣逸無諸苦惱而能厭

命

不字當爲必字蓋傳之訛也若世人明達因

果決志判命或捨命身飼其猛鷲濟彼魚鼈

乃至忠臣烈士以死殉義斯皆難也

何知當爲必字

緣佛言二十難並說凡夫境界非論不生不滅之理

不滅之理

佛言 天下有二十難 **貧窮布施難** 凡人貧乏自逼
不死難 不字當爲必字蓋傳之訛也若世人明達因
果決志判命或捨命身飼其猛鷲濟彼魚鼈
乃至忠臣烈士以死殉義斯皆難也
何知當爲必字
緣佛言二十難並說凡夫境界非論不生不滅之理

其義明矣又據西戌
南蠻語音呼必爲不得覩佛經難凡人不具信根
教安得生值佛世難大人若不結勝因不修衆善則

見聞

六塵之中多爲情欲所惑而能

忍色離欲難

六塵之中多爲情欲所惑而能

求難彼之所好此或于求遂之貽貪冒之名

甚爲難矣見好不

臨難勢利之人威福之地而能唯

能以情恕斯亦難矣

觸事無心難

心求清淨觸境而

物情斯爲難矣

則有饒益

不輕未學難

若能廣究詮理以資智慮斯爲

凡曰群生同稟真性而以能格物

爲難也

減我慢難

急惰則陷無明多聞則有饒益

愚冥徇情彼我慢生違善與諍

爲難矣

廣學博究難

急惰則陷無明多聞則有饒益

是而遷故知識之善者亦難矣

爲難矣

見性學道難

性本

澄湛迷於妄情道本真常昧於愛欲能復本而見性背僞而學道爲難矣

對境不動難前妄境致惑真性故悟之而善解方便難常懷大慈以寂照對之而不動者難矣

不說

隨化度人難

衆生之性亦有利鈍能於

方便以爲饒益者難矣

觀彼我一皆平等斯爲難矣

心行平等難

衆生之性亦有利鈍能於

相眞如之性與虛空

知之無益夫知而不學與不知

道相等故言無形相

同必假修證乃可得

要當守志行譬如磨鏡垢去明存卽自見形斷欲

夫欲通宿命者當須志行

盡消潛通宿命如磨鏡去垢乃見形

矣苟非斷欲守空何以得證道真也

佛言何者爲善惟行道善

義惟情進行道漸至證聖最爲善也

何者最大志與道合大

斷諸攀緣得無漏智

者多力忍辱最健忍者無惡必爲人尊

忍辱之人不懷離愁如彼

勇健多力之人能拒強敵

內不懷惡終爲人所尊也

何者最明心垢除惡行滅

內清淨無瑕

如白圭無玷曠空絕雲心之最明也

未有天地逮于今日

極言其

十方所有未嘗不見得無不知無不見無不

聞得一切智可謂明矣

此已證果位得一切種智故

佛言人懷愛欲不見道者譬如濁水以五彩投其中

於三世具正徧知明之至也

致効攬之

可分仍用力攬

濁水譬染心五欲喻五彩

已不

心欲相投交錯其中也

之喻世人妄想貪愛發亂其五欲也

衆人共臨水上無能覩其影愛欲

可分仍用力攬

水澄穢除清淨無垢卽自見形

濁水之上雖衆臨之無能覩影愛欲交亂

真心昏惑豈得明道若穢濁盡去心歸清淨卽自然見道也

猛火著釜下中水踊躍以布覆上衆生照臨亦無覩其影者心中本有三

毒湧沸在內五蓋覆外終不見道

金者喻染心水躁者喻染心中貪嗔癡三毒煩惱躁躍也以布覆上者喻凡夫被五蓋蒙翳終不得見道也五蓋謂一貪欲二嗔恚三癡四掉舉憇作五昏沉睡眠俱爲蓋覆也

惡心垢盡乃知魂靈所從來生死

所趣向諸佛國土道德所在耳

精勤堅固漸證果位於禪定中乃知魂靈

之所從來乃無常報盡生諸國土道德所在矣

佛言夫爲道者譬如持炬火入冥室中冥闇

冥闇也

其所處向諸佛國土道德所在耳

於禪定中乃知魂靈

滅而明猶存猶字當爲獨
猶字來無義學道見諦愚癡都滅無不
明矣夫已見道愚癡自滅漸證佛智德無不明猶
如持火入諸闇室冥闇都滅而明獨存也
佛言吾何念念道佛訓誘弟子言我行於道常念道更無雜念
須臾也念真諦聖道未利生常行於道利益有情
當念皆是有爲生滅終歸無常修行
之人若常如此起念卽證聖必速矣

佛言熟自念身中四大名自有名都爲無吾者寄
生亦不久其事如幻耳有情之身俱是四大假合以成其形仍假虛名也且地水火風是名四大以要言之卽骨肉毛髮是地津液精血是水煖觸是火四支百脉擺動是風各以假名成此幻身若熟念之何者爲我寄
浮世倏忽而滅都如幻夢爾

佛言人隨情欲求花名譬如燒香衆人聞其香然香
以薰自燒愚者貪流俗之名譽不守道真花名危已
之禍其悔在後時凡世之人但恣情欲惟求虛花之名不憂生滅罔慕真實之道譬如妙之香被人所焚雖得遠近普聞其如形質速盡亦同愚者徒慕虛名而喪道真及禍至危已悔在後時

7 8 9 10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5

佛言財色之於人譬如小兒貪刀刃之蜜甜不足一食之美然有截舌之患也

夫耽嗜財色少時快心及惡積禍來沉淪六趣亦如

小兒刀刃之蜜其甜

至少徒截舌之禍爾

佛言人繫於妻子寶宅之患甚於牢獄桎梏根檣牢

獄有原赦

牢獄之苦或值赦免

妻子情欲雖有虎口之禍已猶

甘心投焉其罪無赦

夫世人爲妻子羈絆寶宅

佛言愛欲莫甚於色色之爲欲其大無外

者莫甚於色故知色

欲之過其大無比也

賴有一矣假其二同普天之民

無能爲道者

滋生死障涅槃唯色欲一端

亦云淫心不除塵不可出

佛言愛欲之於人猶執炬火逆風而行愚者不釋炬

必有燒手之患貪婬恚怒愚癡之毒處在人身不早以道除斯禍者必有危殃猶愚貪執炬自燒其手也

凡世有貪婬恚怒愚癡之毒處人心中若有智者須

早以道消去乃免危殃之禍猶如愚人不早釋逆風

之炬必自燒其手也

時有天神獻玉女於佛欲以試佛意觀佛道

天神者主天界

之神也玉女天女也蓋天欲試佛之意觀佛之道如何也

佛言革囊衆穢爾來何

爲以可誑俗難動六通去也吾不用爾天神愈敬

佛如皮囊中貯諸穢惡難惑六通之佛六通謂神

佛境通天眼通天耳通他心通宿住通漏盡通

問道意佛爲解釋卽得須陀洹

天既知神通不可惑亂因問道意佛爲說

法得證

初果

佛說法華經卷第十一

三

卷十一

佛言夫爲道者猶木在水尋流而行不左觸岸亦不右觸岸不爲人所取不爲鬼神所遮不爲洄流所住亦不腐敗吾保其入海矣木喻於人海喻於道人爲道不爲情欲所惑修行之人堅持戒行不被情欲所惑如水在流不爲二岸所觸不爲衆邪所誑正見之人堅持操行不被衆邪詭惑如沿流之木免其人鬼所取精進無疑吾保其得道矣木無衆滯自至於海如人之猜進免其誑惑必得其道矣

佛告沙門慎無信汝意汝意終不可信言當慎守正意若信縱之卽爲煩惱牽惑也心勿信縱爲煩惱牽惑也慎無與色會色會卽禍生爲煩惱牽惑也蓋色能惑亂入生死苦海爲禍根最大者也爲煩惱斷盡任縱其意必不入邪見也

得阿羅漢道乃可信汝意耳言當慎守正意勿信縱謂舉色者蓋色能惑亂入生死苦海爲禍根最大者也羅漢緣阿

佛告諸沙門慎無視女人若見無見慎無與言其色當視無見仍識勿與交言也若與言者勑心正行其色當視勿與交言也護已

如蓮花不爲泥所汙我持淨戒處茲濁世當如蓮花若欲發言先正其心自誠之曰

老者以爲母長者以爲姊少者以爲妹幼者予敬之以禮凡見女人當作此觀想仍皆接之以其禮意殊當諦惟審也惟想也言觀白頭至足自視內意殊者謂情識盛當審思之用前觀想未能息者卽想自己頭至足故視於內也彼身何有唯盛惡露諸不淨種以釋其意既內視當想身中盛諸不淨穢惡之物露泄不止卽邪意當息彼身自謂此身也

佛言人爲道去情欲當如草見大火來已劫道人見

789101234567892012345678930123456

愛欲必當遠之

佛誠修道之人去其情欲當如枯草已被大火焚劫言急切速避之

佛言人有患姪情不止踞斧刃上以自除其陰佛謂之曰若使斷陰不如斷心心爲功曹若止功曹從者

都息

功曹王者之柄從者謂功曹之從人在上位者若嚴率其下則從者自然稟懼故以心喻功曹

欲情喻從者若自淨其心欲情豈得生也邪心不止斷陰何益斯須卽死

佛言世俗倒見如斯癡人

有姪童女與彼男誓至期不來而自悔曰欲吾知爾

本意以思想生吾不思想爾卽爾而不生佛行道聞

之謂沙門曰記之此迦葉佛偈流在俗間

過去諸佛知衆生罪業皆從妄想生起妄想若息卽無諸惡故迦葉佛會

作此偈流傳於後及釋迦佛因行道聞此女自悔而

退走或半道還或格鬪而死意怯膽弱乃是退走以

修道之徒發精進果決之志矣

佛言人爲道譬如一人與萬人戰

夫一人敢敵萬人者勇猛之極也

夫爲前境所誘乃起愛欲旣爲愛欲所惑憂畏

無畏從之而生若本無愛欲卽憂畏何由而至矣

佛言人爲道譬如一人與萬人戰

夫將兵者或立殊勲而施爵賞自然超於衆也

進行不惑於流俗狂愚之言者欲滅惡盡必得道矣

夫被精進甲仗智慧劍堅持戒行魔障盡滅證無漏智乃得道矣

有沙門夜誦經其聲悲緊欲悔思返佛呼沙門問之汝處于家將何修爲對曰常彈琴佛言弦緩何如曰不鳴矣弦急何如曰聲絕矣急緩得中何如曰諸音

普調佛告沙門學道猶然執心調適道可得矣

佛開聲

將施誨誘乃詢其在家所爲旣對彈琴故佛因以琴聲急緩喻之夫修行之人必使妄念不生身心虛寂則自然調適可得道果矣

佛言夫人爲道猶所鍛鐵漸深垂去垢

垂字當作盡垢乃鐵中

浮成器必好學道以漸深去心垢精進就道異卽身也

疲身疲卽意惱意惱卽行退行退卽修罪

異者謂不能盡去心垢精進成道故使身心疲倦則煩惱煩惱則戒行退戒行退則翻成罪

佛言人爲道亦苦不爲道亦苦惟人自生至老自老至病自病至死其苦無量心惱積罪生死不息其苦難說

夫求道之人不憚衆苦尋師訪道不避寒暑不切苦此則學道之士雖有此苦及證果之後乃出沒三界逍遙自在若塵世之徒惟恣三毒不出離輪迴六趣無有休息生老病死常在蓋纏罪業報應其苦無量

佛言夫人離三惡道得爲人難

三惡道謂地獄餓鬼畜生故言免此三惡

而得人身知其難也旣得爲人去女卽男難女人之業經中具難既得爲男六情完具難旣得男身六根具足免也

情已具生中國難

邊鄙之地多諸障難生在中國實爲難也

奉佛道難

大人得生中土而能既奉佛道勤修者鮮矣

既奉佛道值有道之

君難在既勤修奉而時值明主則自
意染邪必不成道何者其要在聞而行之雖
項則自寬其限妄念隨生涉於懈怠安得成道也

生死事大堅持戒行雖別師數千里其心如一必得道也

菩薩家難既生菩薩家以心信三尊值佛世難

得生正見

之家復有信心乃
值佛世誠哉難矣

佛問諸沙門人命在幾間對曰在數日間佛言子未能爲道復問一沙門人命在幾間對曰在飯食間去子未能爲道復問一沙門人命在幾間對曰呼吸之間佛言善哉子可謂爲道者矣此佛誨誘學者令知念念無常在於呼吸自然絕諸妄想密密精進若謂命在數日或在食

項則自寬其限妄念隨生涉於懈怠安得成道也

佛言弟子去離吾數千里意念吾戒必得道

佛勸弟子若憂

生死事大堅持戒行雖別師數千里其心如一必得道也

若在吾側意在邪終不

得道其實在行近而不行何益萬分耶

若學者雖在師左右而其

意染邪必不成道何者其要在聞而行之雖

項則自寬其限妄念隨生涉於懈怠安得成道也

佛言人爲道猶若食蜜中邊皆甜吾經亦爾其義皆快行者得道矣

佛言我所說經由如蜜味若人食之中外盡甜更無二味慕道之士若悟

經深旨身心快樂當證道矣

佛言人爲道能拔愛欲之根譬如摘懸珠一一摘之

會有盡時惡盡得道也

夫欲出生死苦得大自在必須堅持戒行斷盡愛欲如高

處懸衆珠一一摘之苟心無懈怠卽珠必有盡時若修行之徒銷其衆惡積諸善行久而不退卽諸惡斷盡乃得

佛言諸沙門行道當如牛負行深泥中疲極不敢左

右顧趣欲離泥以自蘇息沙門視情欲甚於彼泥直

心念道可免衆苦

言沙門直心行道欲出生死苦海
須念念相應勿起妄念如牛負重
於深泥中求避泥淖以自蘇息亦
念念憂懼不敢左右顧也

佛言吾視王侯之位如塵隙視金玉之寶如瓦礫視
紳素之服如弊帛視大千世界如一阿子視四釋水
如塗足油視方便如筏寶聚視無上乘如夢金帛視
求佛道如眼前花視求禪定如須彌柱視求涅槃如

晝夜寤視倒正者如六龍舞視平等者如一眞地視

興化者如四時木

夫至聖圓通道無不在豈於世諦而有分別哉蓋以太慈利生隨機
悟物謂王侯之貴不可恃金帛之寶不足貪故興塵

隙瓦礫之喻以制其欲心又以方便之門無上之乘

佛道禪定之名涅槃平等之類可循而不可致滯可
習而不可迷方因廣去就之喻以防執縛之蔽也聞
道之士可以叩寂而悟之焉

諸大比丘聞佛所說歡喜奉行

佛說四十二章經

題焚經臺詩

唐太宗文皇帝 製

門徑蕭蕭長綠苔，一回登此一徘徊。
青牛謾說函關去，白馬親從印土來。

確定是非憑烈焰，要分真僞築高臺。

此臺在洛陽臺者壇也考此燒經比論之壇乃後漢明帝築也元此四十二章經皆有來因是永平七年明帝夜夢一人體有金色項有日光飛空而至殿前明日宣問羣臣有通人傳教占夢奏曰臣聞西域有得道者號曰佛輕舉能飛具六神通今應此夢帝悟大悅卽遣羽林郎蔡愔博士秦景王遵等十二人望葱嶺而往尋西土求迎佛法行至中路月氏國衆乃駭然得瞻迦葉摩騰共竺法蘭二梵僧圓頂方袍之異相乘白馬携釋迦真像白堦之圖并此四十二章一卷回朝時永平十年也

帝喜躬親迎奉宣委鴻臚以陳國禮勅令形畫釋迦頂相於清涼臺因建立白馬寺請此二尊者住院於帝說法至冬值歲旦五岳道士賀正之次道士褚善信費叔才等共六百九十人互相語曰帝棄我道教遠求胡教乃自率衆各將所持道經共上表願與胡佛教比試其真僞帝遂降勅尚書令宋庠引入長樂宮前宣曰道士與僧就元宵日駛集白馬寺南門外立兩壇至期試之西壇燒道經六百餘卷顷刻燒盡唯取得老子道經一卷是真其餘是杜光庭撰今云杜撰也帝觀東壇佛像并此四十二章燒不能壞但見五色神光天雨寶花天樂自振歎未曾有帝共羣臣稱悅太傅張衍語諸道士曰旣試無驗可就佛法其道士褚費等深有愧恧皆氣盛自死餘有呂惠通等六百二十人皆棄冠帔投佛出家因此流通佛教州縣建寺敬益顯于世間三界之中舍識之類蒙恩受賴綿綿不絕也

經

佛說四十二章

卷十

音釋

讒士卿切構音遘

架也

譎音讀誘

痛怨也

分房粉切

虐也

輶止也

鷙

構音遘切

架也

譎音讀誘切

痛怨也

分房粉切

鳥也

殉辭問切

以人送處

徇似問切

物爲殉

徇從也

滔正作昭

也

滔音昭切

波際合無

桎音執在日

足日

桎梏在日

梏音穀在日

根郎音當

檣音當

也

擿責手

淖音闊溺

泥也

礫石也

浙江嘉興府楞嚴守般若堂刻此
佛說四十二章經一卷計字九千
該銀五兩一錢八分二厘
康熙三年七月日

倫

二十二